



新刊張太岳先生文集卷二十五

答李中溪有道尊師

忝至拜去年六月翰貺萬里遣使踰年始通感戢至情非言可喻正少而學道每懷出世之想中爲時所羈紲遂料理人間事前年冬偶閱華嚴悲智偈忽覺有省卽時發一弘願願以深心奉塵刹不於自身求利益去年當主少國疑之時以藐然之軀橫當天

下之變比時唯知辨此深心不復計身爲已有幸而念成緣熟上格下孚宮府穆清內外寧謐而正以退食之餘猶得默坐澄心寄意方外如入火聚得清涼



門以是知山寺幽棲風塵寓跡雖趨舍不同靜躁殊
塗其致一也三塔古蹟一詩不足以紀勝當爲翁作
一記以垂永久顧今冗甚且未遑有便幸寄開山重
造顛末正二三年後卽欲乞身歸政尚當與翁期於
太和衡湘之間一盡平生使旋草草附謝外飯僧銀
二十兩禪衣一具內色紵二端少見遠意並近日奏
對稿奉覽統惟鑒存

答潘總憲笠翁

昔年奉教門下辱翁於後輩中獨蒙鑒許僕嘗感其
意俱未有以當也茲英君御極百度維新僕以淺

薄謬當重任方將弋冥鴻於江海拔碩人於過軸乃
聞翁絕意風塵厭棄人間事白駒過隙祇用悵然諸
公子咸有濟時之才而明允篤誠不忝龍圖之子深
羨深羨廣事近以屬之殷司馬此君才略足以辦此
又假以便宜兵食期一二年當得湯盪定辱翁垂教當
奉周旋

答趙汝泉

薄賀媿不成享乃蒙厚酬彌切慙歉改折所請已下
部覆行堤工須委任得人乃可就功若一處有瑕則
千丈之堅俱屬無用矣近來吏治頗爲清肅唯司牧

者不以民事爲重好爲虛文相誑計日待遷此習竟不可易惟公與監司留意焉

答汪司馬南溟

辱示餉議精覈委悉敷奏明切文辭粹美讀之再過歎挹彌襟獨計部謂支剩之數與徵發相抵幸再加查核乃可以聞也比來一夫作祟幾至燎原幸主上明聖而左右近習亦皆素諒僕之惻誠得以潛折禍萌導迎善氣二三子以言亂政實朝廷紀綱所係所謂芝蘭當路不得不鋤者知我罪我其在是乎若儀諸仲山甫之德則曷克舉焉狼辱鑒獎彌以爲

懼

答司馬吳堯山

脩邊大疏已下部議覆乃督撫二公之見與八議相
牴而撫臺尤爲矛盾何耶設險守要乃邊政之大者
况此係脩復頽廢非創有更建但邊長費鉅須漸次
行之耳馬帥旣被重劾必當罷之第苦代者之難奈
何

與蜀撫曾確菴計劃剿都蠻之始

都蠻爲害多年不容不除聞之譚司馬云蜀中兵餉
取之存留儘可措辦俟兵食已足方略已定可一鼓

平之但用兵之道全在將得其人前承教謂劉顯足
辦此事昨科中用閩事論之鄙意以蜀征方始不宜
輒易大將而司馬又不敢獨當故咨之於公也若其
人果可用不防特疏留之立功贖罪如不可用則當
別授能者公宜以此意明示劉顯俾鼓舞奮勵如玩
寇無功必將前罪併論誅之不敢庇也地方大事唯
公熟計之

與廣東按院唐公

府江盪平懷遠計當不日就戮可追 九重南顧之
憂矣欣慰欣慰 主上以天縱英資勤勤學問比來

一二大事羣情所洵懼而莫必其所止者須臾之間
威底救定自非明主信任勿貳僕得効其赤忠誠
宗社無疆之慶也忝在知契附此以慰懸念

與楚中撫臺辭建第助工

頃聞台從至荆親詢民瘼惓惓以江隄爲慮幸甚幸
甚新構蝸居三院會計欲有所助諸公厚意豈不知
感但僕本心原不敢以一椽一瓦勞費有司故雖督
造錦衣亦止借便差用誠恐驚擾地方也今堤工方
興疲民無措公私嗷嗷困敝至此豈復有餘羨爲僕
營私第乎僕雖無德於鄉人實不敢貽累以賈怨且

去歲諸公所賜坊價已卽給付工匠卽有不足以後
逐年 賜賴及俸入田租陸續湊辦需以二三年可
得苟完矣若諸公創行此意則官於楚者必慕爲之
是僕營私第以開賄門其罪愈重萬望俯諒鄙衷亟
停前命俾僕無惡於鄉人無累於清議則百朋不爲
重廣厦不爲安也人旋附此諸惟鑒原

答保定巡撫孫立亭

公以鴻漸之翼困於燕雀茲膺特簡允愜輿情恒臺
外控三閩內制畿輔安攘之略惟公是賴近來吏治
頗爲清肅惟司牧者不以民事爲急崇尚虛文計日

待遷終鮮實效夫均徭賦役里甲驛遞乃有司第一
議餘皆非其所急也四事舉則百姓安百姓安則邦
本固外侮可無患矣惟公留意焉

答文宗謝道長

叠辱華翰具悉雅情近來俗尚澆漓士鮮實學南畿
多士之區首化之地惟公加意一振之陽明先生從
祀事以宗伯病不能會議久稽題覆好事者遂乘間
而詆之其言粗淺可哂然何傷於日月乎

答宣大孫巡撫

黃酋車夷事前吳環洲撫臺疏甚善卽與本兵議從

其策矣乃督撫之意又與不同而撫臺之疏亦爲中止今本兵姑先覆大疏行督撫議處要之撫臺之策爲長也

答巡撫吳環洲

黃酋事本兵候大疏未至據獨先題適督撫亦有疏至並行咨議幸熟計之趙帥病果痊若尚可驅策宜明告本兵今代者誠難其人也華翰云云具悉

答閱視司馬吳堯山

頃先後大疏所司已先後覆行閱視事竣可歸報主上矣馬帥褫職國法已彰僕以淺薄謬肩重任

雖不足以當天下事然一念公虛平直則可以告於
天地祖宗之靈不敢措一毫私意於其間也乃昨
吳少參有書甚爲公不平其辭怨憤使人難堪今九
邊之事宣大爲重不以付之他人而託公者以公爲
心知故也又面請於上特賜命服以寵其行公視
僕此心爲何如哉渠乃以僕爲厚猾帥而薄故舊豈
不厚誣我哉區區之心惟公垂鑒焉

與操江巡撫院言棍徒假借

近訪得清江駟騙奸徒乃夷陵州人不知其的名曾
在敝鄉馮午山公處代班壞事隆慶四年在儀真地

方附一油客船來京沿途卽詐稱僕家人差送酒米船上擅挂內閣牌面詐寫僕拜帖見翁見海見海之明亦爲所誑給與照身批文一路免抽稅打過關直至張家灣幸僕知之差廠衛人挈送法司問發邊衛充軍至戍所又詐稱僕家人誑惑宣府總兵縱令脫伍不意今又發於清江其言徐寅生張壽童及買潞綢銀遁回原藉云云悉妄也竊思僕素重名檢雖親子弟無敢以毫厘干於官府二年前曾有一家奴指稱小兒名目誑人銀三兩當卽送本府杖死可恨此棍無故隨處打網污人名節今今臺下覺其詐所望

爲僕重治以除禍本柰何又輕縱之渠之罪不止賸
哨今得漏網將來又不知作何狀矣若尚在配所幸
爲僕盡法處之如已逃脫幸蜜與邏者并逃奴朝吉
俱多方捕訪務令得獲忝公知己必同其好惡乃見
真愛冗中草草餘容續裁不悉

答閱視汪司馬南溟

額餉儀本文與督撫會計乃疏聞後又有一二異同
不得不再行審覈亦以衆不可蓋事貴慎始故也議
定卽斷而行之無所復疑遼警方殷借公威重震懼
計已喙允矣增築墩臺及別楮所云俱如議次第行

之

答司馬萬兩溪

昨會舍親西石公言頃者內獄之起衆情洶洶獨公
以爲朝有人焉無足慮者此足以見公知我之深也
今士大夫親見僕行事無一人知及於此者而公乃
在外得之人之識見相去豈不遠哉諸所議畫已下
所司覆行

答兩廣總督殷石汀

惠賊斬馘至萬諸賊當已破膽可次第就戮矣大功
克就嶺表輯寧朝士大夫始服公之雄略而信僕知

人之明昔充國之策惟魏相一人主之僕雖不逮相而公之功烈則過充國遠矣欣慰諸邑令旣便於民何必更調已告銓司悉如尊議

答保定巡撫孫立亭

兵憲之薦今歲不妨暫已二關事體與薊門稍異以分閫爲便俱如尊教近來畿輔之地盜賊橫行京師百里之內一月而二三發似非治平景象今內當責之巡捕外當責之兵備惟公留意督察之幸甚

答河漕劉總督

水道業有成議昨計曹因楊郎一人之言遽欲改陸

僕使人廉得河道疏通轉運無阻故請 旨仍依原
議計曹又言牛欄山河道雖通船隻未造請加詰責
僕亦未從今不知已造船幾何并望留神速處毋致
以小事防大計也

答巡撫郭華溪

懷遠之兵旣未得天時地利之便暫宜解歸以俟大
舉若有他巧可取之尤妙矣此事若非縣令苛急賊
亦未必遽叛事之未形一夫制之有餘禍端已搆數
萬人取之不克至兵連禍結師老財費使 朝廷虛
南顧之憂疆場有不討之賊彼激亂啓釁者死何足

恤哉以是知天下之事惟知幾識微者可與圖成而輕躁鋒銳者適足以憤事階亂而已

答荆守王古林

奏最使至辱翰貺感戢公在郡治理實冠一時政不近名故郡人來者雖無毀辭亦鮮揚譽然僕之所以重公者正在於此非流俗人所知也本圖借寇恐致久淹昨已屬銓部優叙矣

答吳堯山言弘願濟世

吳子感公相知之素故爲公不平然不思渠昔因僕而後見知於公今若此所謂食其粒而棄其本者矣

僕平生所厚士大夫甚多見背者亦不少然終不以是而易其好賢之心卽今日內獄之事可以觀矣二十年前曾有一弘願願以其身爲薦薦使人寢處其上洩溺之垢穢之吾無間焉此亦吳子所知有欲割取吾耳鼻我亦歡喜施與况詆毀而已乎願公勉慰之相見非遠諸容面悉

答吳參議道南

前承華翰以冗不及答頃有寄堯山公一書會間亦可索觀也

答總憲張峇峽言公用舍

自公在郎署時僕已知公頻年引薦實出鄙意不知者乃謂僕因前宰之推用爲介誤矣天下之賢與天下用之何必出於已且僕於前宰素厚頃者不恤百口爲之昭雪區區用舍之間又何足爲嫌哉蔡人卽吾人况前宰非蔡人而公又吾人也何嫌何疑之有願努力勲名以副素望

答督撫王鑑川

辱示番書殆亦華人導之以要我公諭阻之爲當大抵今日虜情惟視公爲向背故僕前面奏主上長城鎖鑰專倚於公一切操縱之機諒公自有定筭矣

黃酋孤虜必無能爲然順義亦挾此以爲重屬夷若
還其所求乞可量許之而示之以不得已恐其常用
此套爲求索之資也屯田事公若熟計其便不妨再
題宣帥被劾諒難復留幸公自擇可代者咨部用之
頃聞虜中旱甚京師亦少雨塵霾累日不解僕日夜
惟邊事爲憂願公留意焉令甥近日相聞否

答劉總督

撫賞兩馬之事前承教屬之計曹本兵一二俱如尊
指議處矣聞近日司道俱不肯著實奉行仍蹈前轍
叩月糧以備閱視之費又夷人闖關有遷延數十日

不去者啓釁胎禍實在於此公何不督責之不從則
亦宜明告於上裁之以法可也比聞虜中甚旱內地
雨澤亦少塵霾累日不解僕日夜以邊事爲憂而
屬意於薊尤甚望公督率文武諸大吏及今加意經
理常若大敵在前庶保無虞昨已面奏皇上言邊
將不得便宜每中制於司道他日脫有憤事當與將
吏同罪決不少貸近來朝廷舉動非復昔比僕受
國厚恩身肩重任死且不避何怨謗之足恤哉敢布
區區惟公垂諒

答薊鎮巡撫言優假將官

辱翰示領悉崔鏞與趙奇仇隙甚深昨調處善地實
兩全之乃因督撫之怒而飛揭中傷以逞其毒非良
士也昨部覆科疏鄙意本欲留用之恐督撫以僕爲
有所私庇於此輩故擬罷之然朝廷自此頗疑文
臣矣僕與馬趙素不識面異時當國者之家奴率與
邊將結拜鮮不受其啗者自僕在事以來內外隔絕
偉門盡墮朝房接受公謁門巷間可張羅亦無敢有
以間語譖言入於僕之耳者又何所私庇於人卽此
兩人之狡猾無狀僕豈不知第以其俱嚙啗宿將部
下又多獷少代者未必能馭卽有癡穎猶可驅策而

用之貢市羈虜本難久恃猝有緩急無可使者故不
得已曲爲保全徒以爲國家耳士大夫乃獨不諒
鄙心柰之何哉公爲觀察當自有公論如以僕言爲
非者幸直賜批駁以爲後來用人之鑒

答河漕王敬所言漕運

四百萬軍儲江海並運洪濤飛越若涉平津自僕忝
知以來實未見有如是之盛者一日侍上語及余
歲漕事天顏喜悅殿上侍臣咸呼萬歲僕因推言
此皆督臣之功也宜加懋賞重任之上深以爲然
茲覽圖冊又以見公儆戒無虞因事納誨之忠也敬

服敬服觸瑟之逆幾成大獄賴天地宗廟之靈
鑒僕赤惻開發聖明得以道善回和雪誣正法滔天
之勢驀然頓已然賤質則因是致病今顛毛種種相
見恐不相識矣華翰謬及敢陳其槩潘君才猷弘達
意思深長他日必不負公此舉然朝廷方有重托
於公舉代恐未能也

答吳環洲

頃吳司馬復命覈三鎮脩守之功以公爲舉首誠爲
確論二帥並逐家丁四散今歲邊事殊可憂當事者
苟欲快意不爲後圖非便計也主上旣以鎖鑰付

之諸公一切更置不從中撓然任之愈重望之愈殷矣

答宗伯董幼海

南宮清峻允屬高流以公居之可謂置瓊枝於玉案
矣當聖皇御極之時正名雋彙登之日區區何力
之有焉華翰歸功深以爲媿

答兩廣殷石汀

嶺表盜藪雖在可封之時不無姦宄之警頃仗公雄
略天戈所指電掃風驅凱聲騰於遐陬餘威震乎殊
俗粵中縉紳亦自謂有知以來用兵制勝未有如今

日之盛者也喜而爲之折屐功高賞薄尚當有待頃
侍上燕閒從容語及嶺表事公之鴻猷峻烈已簡
在帝心矣願益懋勲庸以需大畀

答崇王

先年肅皇帝使僕捧冊立殿下爲王得一望清
光後聞殿下止生長殿下位不得封心竊慮
主器者或乏又以汝泉趙都憲之意遂屬意禮曹爲
之題請僕一念公心非敢望報于左右乃蒙遣使致
謝寵頒厚惠非僕所以存國繼世之心也謹卽付來
使璧歸草草付謝統惟亮原

答周卿李漸菴論用人才

辱翰示具悉雅情天生一世之才自足一世之用顧持衡者每雜之以私意持之以偏見遂致品流混雜措置違宜乃委咎云乏才誤矣僕之淺薄雖不足以與知人然一念爲國之公實無所作故自當事以來諄諄以此意告於銓曹無問是誰親故鄉黨無計從來所作肯過但能辨國家事有禮于君者卽舉而錄之用三驅以顯比懸一鏡以虛照故一時羣才咸有帝臣之願今部署已定以後仍當綜覈名實一一而吹之第恐人樂混同必有以爲刻核者然非

是無以考成績而亮天工也

答藩參高廉泉親家

忝至辱華翰深荷雅情今運屬休明衆賢彙進淹抑
幽翳咸得耀乎陽春可使驂騑久困櫪下乎頃薦書
已上弓旌之招諒在不遠矣冗中草復厚惠槩不敢
當輒以璧諸使者圖說奉覽外拙室所寄令愛薄儀
統希照存

答河漕王敬所

圖說之陳實僕一念赤忠所發因事納誨早辨防微
實有人不及知而愚心所獨苦者非公之高識遠見

不能得之於意表也世所稱爲知己者謂能知其心也今知我者非公其誰倘以執事者之有間綴之以瓊玖俾永其傳則覆瓿之誚庶可免矣非所敢望聊布區區間河淺澁艱行甚艱比來稍覺通利諒亦不出夏杪可盡抵灣矣山澤之氣鬱鬱而未暢皆僕奉職無狀所致惶恐惶恐

答劉總督

界嶺之捷誠足以伐虜謀挫驕氣然賊從此懷憤必當又出於他道當事者未可以小勝狎視也至於撫賞一事幸公留神一處薊門邊計與他鎮不同若能

就此一事處置得宜俾各夷皆畏威懷惠則制虜之策已得其半矣况又日夜圖吾戰守之備先立於不敗以求勝何事不可爲乎願公與在事諸君熟計之

答兩廣殷石汀

辱示知林賊勢孤遠遁求活計當不日可擒迅雷震空妖魅自當褫魄矣慰甚慰甚公爲國家戡定大亂功在旂常僕以參與廟畫借被光寵爲幸多矣筐幣之及非所敢當輒付使者歸璧統惟亮原

答總憲張崧嶽

惟公雋才厚蓄又富於春秋不以此時取旂常勒鍾

鼎乃顧戀庭闈忘在公之義非所望也茲屬休明之
會方將招遺佚於邁軸寧肯縱鸞鶴於雲林大疏已
屬部覆而雅志必不得遂願勉奉簡書以徇國事

答王鑑川

辱示先後二書俱一一領悉以公勲業宜膺殊賞然
忠簡帝心絲綸賁寵則其榮重又近時所僅見也
去年僕力辭四恩亦荷敕獎僕於心感戴竊謂九遷
百朋無以踰之諒公感恩思報之忠亦當與鄙衷懸
符也敕辭乃僕手撰早晚當賁上也田事已屬計部
改行

答汪南溟

辱教迫冗不能一一詳答謹以原札逐款竊附數字
於後疏中亦僭省數句統俟尊裁此行惟公舉動合
宜鑒裁精允敬服敬服

與王敬所

今年閘河水泄轉餉甚艱然終以發運之早雖遭中
梗比之往歲猶爲駛利皆公之功也海運今歲微有
損失議者遂紛紛言其不便此衆庶之見固不足憑
但僕鄙意竊以爲今欲河海並運則當著實料理歲
歲加增若止欲嘗之則二年之間道路已熟何歲以

十二萬石嘗險哉近潘大參有復遮洋總議似爲穩
便不審高明以爲何如僕昨因羣言稍有淆惑但以
國家大計須虚心商量耳

與蜀撫曾確菴計剿都蠻

凌霄旣破我師據險此天亡小醜之時也宜乘破竹
之勢早收盪定之功計蠻衆不過數千我師當數倍
之無不克者攻險之道必以奇勝今可徵兵積餉爲
坐困之形而募死士從間道以擣其虛先年破香鑪
取洮岷皆用此道若不奮死出奇欲以歲月取勝此
自困之計兵聞拙速未覩巧之久也惟公熟計之劉

引太岳文集卷二十一
帥功名著於西蜀取功贖過保全威名在此一舉其一切攻圍之計宜聽其自爲便利勿中制之唯與之措處軍前賞功募士之費計軍中一月當費幾何與其曠日遲久不若暫費速罷之爲愈也凡此皆書生之見謾寄以備採擇

答荆南道施華江

辱翰教深荷雅情聞楚中水患視往年稍平而敝府諸堤俱無恙皆撫臺趙公之功也書稱六府養民之政以水爲首水政舉然後五事可從而理辱教惓惓留意於此楚民庶其有瘳乎

與王敬所論大政冠

月中漕艘已盡抵灣萬庾豐溢緊誰之力歟可慶可
慶圖說訓蒙語耳何足以辱大製僕平生拙于文辭
頗與懶性相成間有強作者亦輒以不得意棄去存
錄者甚尠俟他日乞骸有暇料檢故囊中或有一二
呈教辱示嶺表善後事宜誠經世之計猷顧事涉更
置旦夕未可遽圖僕今事 幼主務兢兢守法愛養
小民與天下休息諸大擘畫必俟 聖齡稍長睿明
益開乃可從容敷奏上請 宸斷行之卽如宗室祿
糧及西北邊用書生爲將與處置屬夷之策皆 國

家大事急宜經理者目前亦未敢言又未知他日可言之時僕尚得立朝否耳嘗謂世廟以大有爲之君而當時諸臣不能佐下風徒取儀文制度紛更一番末以脩玄結局至經國遠猷太平鴻業固置而不講至今令人怏怏也辱教謹藏之篋中以俟乘機入告

答南學院謝虬峯

叠辱華翰深荷雅情陽以先生從祀禮官方欲定議而南疏復至又極其譴曲聖欲并褫其封爵則亦過矣

答殷石汀計劃海寇

林賊旣失巢穴飄泊海上必不能久宜與閩中約會
圖之閩撫劉君有智計勇於任事必能助公共擒此
賊也近有陳廣事者其措置頗大不知於地方便利
否謾寄上一覽幸惟裁教前承厚惠不敢當卽托使
者歸璧更不煩差人於寒家問遺蓋僕近日曾將此
事奏知主上千萬體諒乃見至愛

與河漕萬兩溪論協和克讓

近有人言公與督漕不協兩家賓客遂因而鼓煽其
間僕聞之深以爲憂甚於憂洪水也夫河漕皆朝

廷所軫念者也二公皆

朝廷所委任者也河政舉

漕運乃通漕運通河功斯顯譬之左右手皆以衛腹
心者也同舟而遇風櫓師見帆之將墜釋其櫓而爲
乏正帆帆者不以爲侵官櫓師亦未嘗有德色但欲
舟行而已二公今日之事何以異此唐虞人才非獨
異於後世也良由舜禹以克讓之道昌於上合九官
十二牧爲一人以共熙帝載故治功獨隆禹之功地
平天成萬世永賴及將受攝舉天下之重而讓之皐
陶叮嚀反覆惟恐皐陶之不已先也然禹以是而益
聖而頌其功者至今不衰故曰旣以爲人已愈有旣

以與人已愈多近時士大夫有才者不少惜哉不講
於此道故治亦不古若夫大道之行也與三代之英
僕未之逮也而有志焉僕願二公之留意也朋友之
誼所宜切磋故敢獻其愚唯公垂聽焉

答郭華溪

懷遠之事初謂成於有激故往者奉書云云意或可
以分北治之不謂其怙終不悛敢行稱亂如此則天
討所必加雖費財動衆亦難中止矣一切剝處事宜
公所畫俱當惟公自裁便宜行之不敢中制

答張總憲

頃侍 上於便殿從容語及公所陳二疏歎賞者久
之且謬以僕爲薦拔得人僕因說 上以詢事考言
綜覈名實之道後蒙 天語嘉納嗟乎以孤特無侶
之士立志於邊關萬里之外而能上徹 九重獨蒙
眷獎非至誠而能若是乎有君如此何忍負之此公
報 國之秋也願樹勲庸以酬 知遇

與王鑑川言兢業進退事

頃侍 上於便殿以言及邊事 上因問宣大重鎮
王總督何故取回僕對言朝廷用人不宜竭其忠力
王在邊久且少休之他日不妨再用 上問誰可代者

僕遂以方金湖對無何而臺諫之疏至僕竟以對
上諸擬旨行之然公之出入實係虜之向背邊鎮重
輕今東貢未完金湖未至僕於此兢兢臥未能安枕
也古人去之日如始至惟公留意焉

答司馬王繼津

頃者處分實出鄙意竊以公資望自可徑長六曹不
必又出開府乃所以相厚也僕自當事以來閉門却
掃士大夫公言之外不交一談舊時讒譖之風庶幾
丕變茲以公之雄略不獲及時展布則蔽賢之罪當
在於僕未可歸咎他人也幸遵新命共佐明時勿復

致疑乃見高雅

與王繼津論君臣之義

蓋聞君臣大義分無所逃時乎時乎難以再得孔子
大聖以時仕止然猶七十說不遇而不止豈好爲是
柄柄者與誠達於君臣之分也唐虞之世九官十二
牧師師濟濟各效其能豈必人爲禹稷位皆百揆而
後愜於心哉誠欣於時世之遇也方今堯舜在上屬
任忠賢僕躬履貫魚之行寤寐孜孜用天下賢者效
之于上士生於今義無所逃以其時則可矣公乃
獨傲然遠引慨慕巢由嘲哂禹商欲自越乎不逃之

分而背乎不易得之時此愚蒙之所未譬也雖然人各有志何可相強聊爲道其區區如此惟高明裁之大疏部覆休致旨允調理仕已之途尚未定決惟公審圖之

與殷石汀論吏治

爲國之法似理身元氣欲固神氣欲揚廣中患不在盜賊而患吏治之不清紀綱之不振故元氣日耗神氣日索數年之前論者謂朝廷已無廣東矣自公一振之而傾者安黠者戮災州以寧豈易地易民哉元氣漸固神氣始暢耳今主上天縱英明僕日斤

斤焉以振紀綱察吏治安民生爲事願公持而行之
毋渝其初心母畏於羣議則元元之幸也 先後三
書俱至冗中匆匆附復諸惟鑒原

答蜀撫曾確菴

十月十四日聞九絲捷音不覺屣齒之折殄此巨寇
不惟蜀民安枕且 國家神氣藉此一振四方有逆
志干紀之人亦將破膽而不敢恣睢矣喜甚喜甚此
地險要宜也兵設官以鎮之其有功有罪人負及一
切善後事宜當次第俱奏區處

與廣東督撫

向者奉書言懷遠云云深有感於始事者處置之失
宜謂可不煩兵而服念旣怙終稔惡又天討之所必
加今以數月未聞捷報日夕懸懸且古田餘孽亦將
視此以爲向背南夷頑梗德義所不能化唯懼於威
強耳公其審圖之

與閩中巡撫劉凝齋

閩中數年無警當事者務沽節省虛名以致緩急無
指誤事非小公所請者已屬該部一一覆行俞帥老
奸志意已隳難以復用非新壯將軍不能辦此胡君
舊在閩中頗著戰功銳於功名惟公結以誠信激以

忠義必能有所建立也用兵機宜難以遙度甌嶺以
東一付於公

答督撫吳環洲

頃者柔服青把都一事俱見公之雄略慰甚議者咸
謂今日虜情尚可數年無事然朝廷建安攘長策
非苟圖旦夕之安而已此意惟公可語亦惟公能辦
之

答工部郎中劉公伯燮言用人取譽

僕近來用人處事一秉公心諍持愚見旁人無所關
其說士大夫公見之外不延一客公談之外不交一

語卽有一二親故間一過從不過相與道舊故遣客
懷而已無一語及於時政乃今蒙德者謂有人譽之
失意者輒謂人毀之皆非知僕之心者也戴公之舉
實主上體念邊臣至意在僕猶不敢借此以市恩
况其他乎義河云云殆不其然

答大司馬萬兩溪

老父幸登七袞辱書問舍弟小兒又承扁額之賜感
荷厚情言不能悉但近來交際禮廢曾謂中外相知
者不煩遣使問遣此意主上亦察知之僕不敢自
背其言以欺朝廷忝在心知尤願體諒可也

答王鑑川

虜酋款服邊鄙輯寧始終皆公之功僕雖曾借前箸
少効區區所謂文墨議論者耳公乃讓美推能謬爲
引重捧讀大疏背汗心惶故不敢擬廷議之旨誠以
蒙恩而後辭不若先自寢閣之爲省事也本兵方欲
題覆公之勲勞自宜首叙若諸文武將吏因人成事
者已經屢錄恐難以盡優也

答問卿陸五臺

愚子弟僥倖凡在交知賜賀者俱不敢領承盛儀謹
璧諸使者幸惟原亮承別楮祇畏云云深荷道誼同

心之愛僕自受事以來日夕兢惕凡事關宗社生靈
必齋心默告於上帝二祖而後行不敢告者不
敢爲也誠以人臣之義靖共匪懈况僕今處多懼之
地當至重之任敢不畏乎再拜稽首師公昌言

與李大僕漸菴論治體

明興二百餘年矣人樂於因循事趨於苦窳又近年
以來習尚尤靡至使是非毀譽紛紛無所歸究牛驥
以並駕而俱疲工拙以混吹而莫辨議論蜂蠅興實績
罔效所謂怠則張而相之之時也况僕以草茅孤介
擁十齡幼主立於天下臣民之上國威未振人

有侮心若不稍加淬勵舉

祖宗故事以覺寤迷蒙

針砭沉痾則庶事日隳奸宄窺間後欲振之不可得
矣故自僕受事以來一切付之於大公虚心鑒物正
已肅下法所宜加貴近不宥才有可用孤遠不遺務
在強公室杜私門省議論覈名實以尊主庇民率
作興事亦知繩墨不便於曲木明鏡見憎於醜婦然
審時度勢政固宜爾且受恩深重義當死報雖怨誹
有所弗恤也乃朝夕進說於上前則又惓惓以恭
儉仁厚培植純一未鑿之良卽帝鑑所載及近日何
宮允云云可見其梗槩期以數年之後主德旣成

治具畢張乃收管鑰舉綱維而歸之於上稽首明
辟乞骨還山此區區之微志也而庸衆喜於委狗奸
宄憚其精覈又有一種腐儒動引末季事以搖亂國
是不知本朝立國規模與前代不同本之威德並施
綱目兼舉無論唐宋卽三代盛王猶將遠讓焉而宋
時宰相卑主立名違道干譽之事直僕之所薄而不
爲者頃辱華翰深合鄙心至於舉劾失實及獎率科
貢云云俱於實政大有裨益乃知庸衆之人難與論
尋常之外識時務者謂之俊傑今人旦夕見僕行事
者猶不相知而公乃冥契於千里之外人之識見相

越豈不遠哉人旋敢布區區

答吳環洲

大疏已上銓部且議題覆公此後但宜默付之公論而已爲國任事之臣僕當與之同去就者公第安心勿慮

答吳道南

邊屯俱興士得宿飽公之功獨冠諸道承以餘粒見遺卽令家人炊之爲益一餐焉

與殷石汀經略廣賊

諸良寶必死之寇而各官乃易視之其敗固宜一撮

許殘賊不能克則諸山海逃伏之盜必將乘勢再起
將來廣事不可便謂無虞大抵南賊譬之蔓草刻盡
還生從古以來經略南方者皆未能以一舉而收盪
平之功其勢然也今當申嚴將令調益生兵大事芟
除見賊卽殺勿復問其向背諸文武將吏有不用命
者宜照 敕書悉以軍法從事斬首以徇了此則諸
不逞之人皆破膽而不敢旁睨矣不惜一朝之費而
貽永世之安惟公留意焉初擬將屯事責之陳奎今
廣中士大夫皆云渠敗衄之餘氣阻力挫恐難展布
姑從降調已屬銓部另擇能者代之然此雖該道之

事而督率驅策則惟仗於公非該道所能辦也

答王敬所

圖說訓蒙語耳乃辱公渙發佳思冠以雄文駑馬而先之以珙璧魚目而盛之以華櫝不乃爲忝乎若其文辭之粹歟意義之淵奧則非淺陋所能揄揚也仰感仰感近報漕艘過淮已千餘則今歲糧運又當速達矣深慰深慰

與楚撫趙汝泉言嚴家範禁請託

小宅原擬 賜金構一書舍耳不意錦衣龐君遂摹京師第宅大事興作費至不貲屢厯主念給與頻蕃

絕平本面復益罪過赧忤之衷口不能悉此後更無
煩存注以重不肖之罪老父高年素懷坦率家人僕
輩頗聞有憑勢凌爍鄉里溷擾有司者皆不能制藉
公之威明示兩司及敝處守令諸君但有如前所云
者幸卽爲擒治其所請囑無問於理可否悉從停閣
有強梗不法者解來僕面鞠之欲得而甘心焉僕今
待罪政府兢兢自守門戶舉動皆諸差人所睹見嚴
之於官守而縱之於家鄉人其謂何卽諸君愛我亦
不宜用世俗相處也僕平生耻爲矯飾其所云者悉
出赤悃萬惟垂亮

與曾確菴計平都蠻善後事

都蠻自擅不討之日久矣豈知王師動於九天從衽
席上攫而取之乎自 冲聖嗣位以來方內又安四
夷嚮風旃裘之君厥角稽首獻見恐後海陬跋扈之
儔山徼陸梁之輩天戈所向殲殄無遺此徃藉所希
聞間代而一覲者也僕以剪劣謬司鼎軸際茲盛會
竊以爲榮可不謂大幸歟功高賞薄尚當有待所示
善後事宜便屬所司覆行更無異議

答薊遼總督方金湖言任事

初鑑川內轉 主上嘗面詢誰可代者僕卽以公對

公之秉鉞 上所簡也明興以來國有艱鉅之事衆所悞悞觀望而不敢承者率楚人當之願公勉旃酌恩報 國蜚英騰茂在此行矣

答殷石汀

前賫奏人回已具啓復頃巡按所奏林賊事情與公所報不同僕甚訝之已卽示意部科言此事當一屬之於公不宜輕有指授其撫剿便宜願公詳計之兵機在呼吸之間便有變態安可預度然大率盜賊奸宄惟當攝吾之威罕能懷吾之德如機有可乘一鼓而殲之雖被虜坐鎮之人亦不足惜也撫賊聲不可

傳遠宜以密用前喻嶺賊如蔓艸難以盡拔唯旋生旋除之耳

答趙汝泉

辱華翰知道從年餘尚未回省大禹勤勞民事召伯周行阡陌不是過矣江漢之民庶其有瘳乎感仰感仰僕自爲童子時見撫臺守巡巡行縣邑荒僻咸至而供億省約民不告勞故上無不究之澤下無不達之情今則不然上官憚於巡行而百姓苦於供費矣其職矣君子爲政固在先勞然先之而不從則亦不免繩之以法不然徒以一身勞之無益也今天子

軫念元元精覈吏治諸守令回任當別是一番作用
唯公加意振策之水利次第脩舉必有成效

答總憲吳太恒

趙陵豎旗事殆妖人以此惑衆耳但宜以靜鎮之不
必紛紛搜索保甲之法行則奸人自無所容第須著
實嚴行乃爲有益毋徒取具彌文可也中州重鎮密
邇畿輔務農講武足食足兵乃今日所最急者餘皆
迂談也唯公留意焉

答太常殷秋溟

僕少耽沉寂每有出世之想不意中道爲時所羈縻

遂至於此且欲暫了人間事以酬俗緣然於四方高
流靜侶未嘗不神交而冥契也生平所聞士大夫稱
公之高韻恨不得一披晤焉茲者暫借留寺終期愜
此素心

答王敬所

近報漕艘過淮者多計當不後於去歲若中道更有
阻滯則責在河道矣

答吳環洲

近事已有旨處分 朝廷用賢三至而信之愈篤公
亦如何爲報耶頃督撫方公聞有南疏急使人來留

公甚懇公亦宜作一書謝之吳王二君俱如所擬加秩管事

又

前以公大意傳與督撫方公昨有書來言事有宜釐正者當亟處之其未能驟變者次第措畫要令毋失制虜之初而已當局之人責任艱重幸公委心維助之頃於謾公處見來翰謂功不必出於已至哉斯言非有道者孰能之

答廣西撫院郭華溪

聞懷遠奏凱無任浣慰兵已深入須盡殲之母使易

種於斯土又煩再舉也

答翰學余同麓

辱華翰知文從已至留都無任欣慰小兒昔荷陶鑄
叨舉鄉薦終以寡陋黜額龍門唯垂念夙誼時惠教
督是望

答宗伯董潯陽

僕昔在詞林隨公之後淺薄碌碌公所知也不自意
蹈躐鼎鉉遂膺顧託之重又不自量強而肩之日
夕惴惴惟虞顛仆比辱翰示獎許迴情譬彼孱夫負
千鈞之重上太行之坂旁有力者不憐而惜之更爲

耶泮獎借將令孱者不至絕臚委頓不已也惶媿惶
媿乃若主上之明聖虛已純心能使宮府穆清宦
戚斤斤奉法則誠書傳所希聞當與海內簪紳同心
慶戴者也

與王敬所言關防棍徒假借

近苦河路奸人動稱寒家賁送米物誑騙騷擾屢懲
不止僕今在旅寓朝夕饔飧之費悉以薄俸易之旅
易旅用不能爲終歲之計况家素貧困老父母在堂
尚須微祿寄養豈復有餘積給充宦資乎凡言此者
悉妄也顧不知者難以戶曉今僭刻一信牌給付各

往過緊要官司收執以便詰驗假公威重照別紙所
開諸處分給禁約取具收結繳查如有犯者仍望卽
置之重法以全僕曲廉小節恃愛瑣瑣統惟垂亮

與王總制言關西縣志

嬰藻香也

林隨公之後淺薄荷荷公所知也不自意

知凡凡奉志俱結書軒祇希聞當與載內晉縣同公

殿凡若惟主主之則望盡山峰山嶺對宮林默哉寄

眼端幾許許今昇昔不至縣觀委助不也也皇殿對

新刻張太岳先生文集卷之二十六

答河漕王敬所

辱示知運艘已於三月十一日盡數過淮無任忻慰
聞度江遇風諒無大損若前途通利則額賦可以畢
達國儲日裕矣今計太倉之粟一千三百餘萬石
可支五六年鄙意欲俟十年之上當別有處分今固
未敢言也

答蜀撫曾確菴

先後承翰示俱一一具復昨孫院有䟽言殘蠻未靖
不知其意所出大剿之後竄伏林谷者豈能盡殲要

在從容綏定之耳譬之人積病雖除餘毒尚在良醫
當此時正宜消息緩之則釁孽復萌急之則重傷元
氣不可不慎也

答藩伯吳小江

頃者主上特發淵衷舉行曠典而公以卓行清望
爲天下舉首自此海內多良吏矣幸甚今賴天地
宗社之靈中外頗稱寧謐惟是黎元窮困賦重差繁
邦本之虞日夕在念頃蒙天語叮嚀亦以愛養百
姓爲急願公思所以奉宣德意加意元元是望

答銓部李石塘

惟公往在西臺屢聞讜論比奉翰札率多溢美之詞
豈僕德衰於昔不足以來天下之善耶抑公欲卑論
儕俗以取通顯耶考功之缺已屬銓曹調補其人則
太宰所自擇者也

答總憲廖春泉

別諭三件領悉靖州土兵在廣右甚無紀律入楚境
震公之威又處置得宜故歛手屏跡耳此輩如毒藥
猛虎誠不宜輕用敝族家人雖頗知奉法然小小擾
涸未必盡無銜勒鈐制不敢一日釋也公知我之深
者幸惟留意考成一事前奉明旨督責甚嚴幸一

一如期完報有勢不能完者不妨明奏改限

答廣西巡按郭華溪

得報知懷遠已定有干紀者皆殄滅無遺欣慰但
兩廣之人好爲議論臺諫無識者往往誤聽之訛言
屢興賴聖明遠矚三至不疑若如昔時之政則風
波滿海內矣粵地所患不在盜賊而在人心不公是
非不定紀綱不振法度不行可恨人旋草草

答督撫劉百川

前有人言公躬履河上見沙淺難行頗悔爲張僉憲
所誤欲罷其役而嫌于自改故以爲問今計筭久遠

果便于人則曹子之言固可從也已屬計部覆行張
齊賢云自古疆場之患非盡由夷狄亦多邊吏擾而
致之頃墩軍襲殺屬夷情甚可惡宜卽梟首以洩屬
夷之忿杜將來之患今人口語嘖嘖咸云南兵無紀
律專肆貪縱今有此又好事者之資也其同惡之人
亦宜以軍法處之烽火爲軍中耳目最宜嚴謹古之
爲將者鼓一鳴卽前有湯火不敢不赴金一奏卽見
利可趨不敢不退今平時自爲出入而管軍者不知
臨陣何以號令之乎臧總理聞平日馭軍甚嚴今安
得有此

答保定巡撫孫立亭

導河事已下部議處 上議務在安靜不擾四方言
利病者非萬不得已率皆報罷故擬旨云云辱示小
牌俱已給發深荷體諒厚意

與荆南道府二公

承示三款深於地方有裨但近請榷稅者該部皆執
不肯允況先年議有廢府州縣銀近百兩院又奏留
存積祿糧銀目前尚可支措俟明歲再議未晚且僕
於此亦有小嫌今方修建 賜第不知者母謂公欲
惜公費以助私營乎若後三款則皆利民急務僕卽

明屬所司行之無不可者又昨王太常言府中有一
淤洲公欲寒家人領極知公厚意但利之所在人爭
欲之擅衆所利則怨必叢積家有薄田數畝可免饑
寒老親高年子弟驚劣誠不願廣地積財以益其過
也縷縷之誠惟公亮之

答兩廣殷石汀

頃得閩臺劉凝齋書言林賊遁出海洋爲西南風阻
泊廣中向僕回患其出海難制今若此殆天亾之矣
閩帥旣過境計今想已成擒了此則廣中可望寧定
忌者亦無所容其喙矣

答巡撫張公守約

前承翰貺去人竟未索書謹謝賤日有惠槩不敢當
輒用歸璧極知公厚意中心藏之此後幸無煩差人
於寒舍問遺恐涉形跡石汀督廣數年勞苦而功高
然廣中夫亦有不悅者頃曾面奏主上專任而責
成之聞公與之素雅尤望同心共濟計安地方以迨
朝廷南顧之憂

答薊遼總督方金湖計處板升逆種

板升諸逆悉除固爲可喜但公此時只宜付之不知
不必通意老酋恐獻以爲功又費一番溫賞且使反

側者益堅事虜之心矣此輩正宜置之虜中他日有用他處不必招之來歸歸亦無用第時傳諭以銷兵務農爲中國藩蔽勿生反心若有反心卽傳語順義縛汝獻功矣然對虜使却又云此輩背叛中華我已置之度外只著他耕田種穀以供虜食有犯法生反心任汝殺之不必來告以示無足輕重之意此中大計策公宜默喻之不可令那吉知也

答中溪李尊師論禪

正昔在童年獲奉教於門下今不意遂已五旬霜華飛滿鬚髮比之賢嗣上年所見又不侔矣意生分段

之身刹那移易遷變人烏得而知之可慨可慨正以
淺薄謬肩重任目前幸得方內又安四夷嚮風寔賴
主上聖哲百官奉職所致非正之寡昧所能仰佐其
萬一過承翰獎彌以爲媿向者奉書有衡湘太和之
約非復空言正昔有一弘願今所作未辦且受先
皇顧託之重忍弗能去期以二三年後必當果此可
得仰叩毘盧閣究竟大事矣三塔圖說披覽一過不
覺神馳冗甚未能記俟從容呈上

答總憲李漸菴

方今言理財者其說紛紛皆未知設法以督完正供

之爲便也馬政大䟽已下部議覆誠如實行之不惟
便民且大裨於國計也

答殷石汀

辱示林賊分踪遠遁廣兵西追閩兵東扼計當爲金
魚矣乃近報閩師已收還西防則夾剿之功又恐難
必然賊覘知閩師退必走閩閩人見賊入境勢不容
不急救廣兵因而尾之亦成擒之勢也諒此時已盪
定殆縷縷及此

答薊遼督撫吳環洲言虜情

修邊之議舊督撫甚不以爲然謂邊人連年修築勞

瘁已甚宜少體之乃方公則又銳意欲舉揆之二議
方爲優焉已下本兵議覆近日虜情大畧可見彼之
心離勢渙偷活苟安我則政事修明內外輯睦盛衰
之機昭然可觀故向者奉書謂後不當議守且當議
戰良有爲也辱示云云深慰鄙念誠得敢戰之士二
萬人足辦吾事矣然不宜輕示機緘令人窺測昨養
廉地土事已喻意陳道長以古人不問市租之意頃
疏至處之甚優爲將者亦宜戴恩圖報可也

答殷石汀言宜終功名答知遇

先後奉手教皆有釘封捧讀數回不勝於邑竊謂古

人居官有解組棄印浩然求去咸以不獲知於主志
不得行或其主雖知之而爲當時執政者所排忌或
有石畫妙筭而當事者不爲之主持使其忠謀不售
則其去宜矣僕自去歲曾面奏 主上曰今南北督
撫諸臣皆臣所選用能爲 國家盡忠任事者 主
上宜加信任勿聽浮言苛求使不得展布 主上深
以爲然且獎諭云先生公忠爲國用人豈有不當者
故自公當事以來一切許以便宜從事雖毀言日至
而屬任日堅然僕所以敢冒嫌違衆而不顧者亦恃
主上之見信耳 主上信僕故亦信公則公今之求

去者爲不獲于 上乎爲不合於執政乎二者無之
而獨以浮忌之口卽欲引去是忍於背 君相之知
而重於犯庸衆之口也願公勿復以爲言了此殘寇
爲地方計慮久遠悉力以圖之彼中人此時雖不能
盡諧他日必有尸祝之此大丈夫不朽之鴻業也他
何足惜侯廣事大定亦必移公他處以休驥足决不
以嶺表爲公玉門也鳳賊西遁不遂又欲東奔力屈
智窮情勢已見但雲海茫茫邀之何所必湏以計誘
之驅入羅網乃可成擒萬里指授恐緩不及事在公
審圖之耳僕料此賊若不獲必走閩中爲閩人所得

若爾公卽宜歸功閩人使之趨利而協力乃勝筭也
林賊事若有確耗幸惟密示以慰懸懸撫民願焚械
歸籍此卽古人賣劍買犢之化也公威德遠洽敬仰
敬仰所示善後諸款皆大著數容與本兵計處行之
人旋先此附復餘容續裁

與操江宋陽山

南畿根本重地江洋盜賊縱橫近來湖廣江西已屢
發矣元末之事可爲殷覽比來處分實不得已惟公
亮之天下之事以爲無足慮則必有大可慮者故古
人詰戎治兵當太平之世尤兢兢焉公有經國遠慮

者幸惟留意

答方金湖

聞西市將完欣慰欣慰虜表宜與改定合式乃可其所請乞亦酌量與人大抵虜有求在彼不必其盡從而在我尚求爲可繼操縱之機在公審之而已刺麻僧來曾備問彼中事其板升諸逆倡爲流言殊爲可惡公可因此機省諭順義言此輩甚不樂貢市利在搶掠如有流言宜以法處之庶得永遠和好丘昌原係叛賊其子不可使爲頭目恐致壞事彼雖能卽廢之然亦少設難從之請使彼常曲而我常直彼或負

約而我常守信則亦制馭之一機也山西撫臺病勢如此豈可久留嚴君遠在萬里未能卒至已改推鄭君洛代之當令星馳赴任此君在上谷久素諳邊事亦可爲公同心之助也

答宣府吳撫宅

近督撫方公亦報土蠻使人糾誘順義而順義不從具見其忠順之堅青把都之說決出於薊人之虛誑蓋因渠今結婚東虜故屬夷遂吠影虛傳以邀賞耳然因此省諭一番亦足以發東虜之謀而孤其勢薊人陰受其利咸公之功也今歲貢市愈爲安靖所求

鐵鍋已屬所司允之但須官給爲便仍責令來歲以
所壞抵換蓋以塞書生之說謂資寇兵也近方公有
書亟稱公之忠猷冠於三鎮誠爲確論鄙悰不勝幸
甚

答應天巡撫宋陽山論均糧足民

來翰謂蘇松田賦不均侵欺拖欠云云讀之使人扼
腕公以大智大勇誠心任事當英主綜覈之始不
於此時剔刷宿弊爲國家建經久之策更待何人
諸凡謗議皆所不恤卽僕近日舉措亦有議其操切
者然僕籌之審矣孔子爲政先言足食管子霸佐亦

言禮義生于富足自嘉靖以來當國者政以賄成吏
朶民膏以媚權門而繼秉國者又務一切姑息之政
爲逋負淵藪以成兼拜之私私家日富公室日貧國
匱民窮病實在在此僕竊以爲賄政之弊易治也姑息
之弊難治也何也政之賄惟懲貪而已至于姑息之
政倚法爲私割上肥已卽如公言豪家田至七萬頃
糧至二萬又不以時納夫古者大國公田三萬畝而
今且百倍於古大國之數能幾萬頃而國不貧故僕
今約已敦素杜絕賄門痛懲貪墨所以救賄政之弊
也查刷宿弊清理逋欠嚴治侵漁攬納之奸所以砭

姑息之政也上損則下益私門閉則公室強故懲貪
吏者所以足民也理逋負者所以足國也官民兩
足上下俱益所以壯根本之畧建安攘之策倡節儉
之風興禮義之教明天子垂拱而御之假令仲尼
爲相由求佐之恐亦無以踰此矣今議者率曰吹求
太急民且逃亾爲亂凡此皆奸人鼓說以搖上可以
惑愚闇之人不可以欺明達之士也夫民之亾且亂
者咸以貪吏剝下而上不加恤豪強兼并而民貧失
所故也今爲侵欺隱占者權豪也非細民也而吾法
之所施者奸人也非良民也清影占則小民免包賠

之累而得守其本業懲貪墨則閭閻無剝削之擾而
得以安其田里如是民且將尸而祝之何以逃亾爲
公博綜載籍究觀古今治亂興亾之故曾有官清民
安田賦均平而致亂者乎故凡爲此言者皆奸人鼓
說以搖上者也願公堅持初意毋惑流言異時宰相
不爲國家忠慮徇情容私甚者輦千萬金入其室
卽爲人穿鼻矣今主上幼冲僕以一身當天下之
重不難破家以利國隕首以求濟豈區區浮議可
得而挫奪者乎公第任法行之有敢撓公法傷任事
之臣者國典具存必不容貸所示江海條件俱當

事理䟽至卽屬所司覆行

懋修曰如此言語
急公而招怨耳

答薊鎮吳環洲料虜虛報誑賞

薊鎮之報竟成烏有皆屬夷誑賞之言但彼中在事者利害切身一有所聞輒行奏報爲他日免罪之地固未暇審其誠僞也此等事但觀廟堂處分何如項僕聞薊報卽戒彼中以鎮靜持重務以整暇勿致張皇而託公傳諭西虜先事伐謀乃是一冷着果得其用此不惟可以解目前之患又有以銷未然之變也因憶前隆慶庚午宣大忽報西虜犯薊薊人偵探者因遂稱見虜已西行犯在旦夕各路之兵嬰牆擺守

京師亦爲之戒嚴廟堂皇皇卽謹守城之策是時內
江方幸虜之來以信其言興化不能主持舉錯紛紛
皆極可咲而虜終無影響防守一月見罷費以數十
萬計頃東報沓至若如往日舉動則又成一咲柄矣

答兩廣殷石汀

前奉手書懇斬解任想未見近旨也主上屬托
甚重排衆議而用公此恩似不可忘且廣事十已
八九倘代者不能守公之策致有虜元恐公之心亦
有所不安也俟求得代者卽爲公處決不久淹南溟
曾轉示公所寄林賊事一冊具悉賊情今但當以治

內爲急二賊相機徐徐圖之不可以二豎子自困廟
堂自有主張非浮言所能淆也

答總憲劉紫山

佳貺屢頒豈敢終拒況公今已解任而猶惓惓不遺
如此厚愛真切亦不忍違但僕於交際之禮久已曠
廢往來公差人所親見又嚴飭族人子弟毋敢輕受
饋遺故雖相知親舊有惠亦槩不敢當非欲矯抗沽
譽實以當事任重兢兢焉務矜小節以自完而已用
是輒以厚惠仍璧諸來使然心領雅情固不藉于物
也

答方金湖計服三衛屬夷

辱示屯政云云俱於事理至當願公堅定行之屯政
舉則士得飽食可以議戰矣比者遼左之功固爲奇
特 朝廷賞功之典亦極其隆厚然僕於此蓄意甚
深謹密以告公今九邊之地薊門爲重以其爲 國
之堂奧也自嘉靖庚戌以來虜禍日中於薊至罷九
邊之力以奉之而內地亦且困敝然所以釀此禍者
皆屬夷爲之也國初棄大寧之地與之冀其爲吾藩
屏而今乃如此故屬夷不處則邊患無已時然欲處
之非先加之以威彼固未肯頽首而服從也今西虜

爲貢市所羈必不敢動獨土蠻一枝力弱寡援制之
爲易今擬于上谷練得戰士二萬遼東二萬多備火
器却令薊人平時將內地各城堡修令堅固視三鎮
士氣已振度其可用則屬夷來撫賞者一切以正理
處之凡額外求討及捉軍要賞者悉正以軍法彼不
遂所欲必結虜來犯我則據臺以守過之邊外使之
一騎不入在我雖無所獲而在彼已爲失利亦策之
上也如其賊衆潰墻而入則亦勿遽爲倉惶但令薊
將歛各路之兵四五萬人屯扼要害令諸縣邑村落
皆病野入保勿與之戰而上谷遼左不必俟命卽各

出萬人遣驍將從邊外將諸屬夷老小盡殲之令大將領一萬人入關不必衛京師徑趨薊地伏於賊所出路彼賊雖已入內地見我不動必不敢散搶不過四五日虜氣衰矣衰則必遁然後令薊人整陣以逐之而宣遼兩軍合而蹙擊彼旣饑疲又各護其獲敗不暇救而吾以三鎮全力擊其墮歸破之必矣一戰而勝則薊鎮士氣旣倍土蘇諸酋不敢復窺而屬夷亦皆可脅而撫之以爲我用薊事舉則西虜之貢市愈堅而入援之兵可以漸減九邊安枕無事矣愚計如此今先試之於遼左蓋遼人素稱敢戰而李將軍

亦忠勇可用故厚賞以勸之懸利以待之亦致士先
從隗始之意也公視愚計如以爲可用則幸與雷帥
密議必得戰士二萬人多備火器乃可今各鎮巡標
下及近處守兵可得二萬否雷帥膽畧可當此事否
聞白允中有才畧可用爲奇兵之將否此舉雖在一
二年後然其工夫湏及早圖之書生狂談必爲智者
所笑謾以奉聞竚俟裁教

與南臺長言中不干外政

主上雖在冲年天挺睿哲宮府之事無大無小咸虛
已而屬之於僕中貴人無敢以一毫干預此公在北

時所親見也僕雖不肖而入養君德出理庶務咸獨秉虛公以運之中貴人無敢有一毫阻撓此亦公在北時所親見也柰何南中臺諫諸君輕聽風聞好爲激語或曰某與中貴人相知或曰某因中貴人得用或曰某爲新鄭之黨不宜留之或曰某爲新鄭所進不宜用之紛紛藉藉日引月長甚無謂也卽如太宰之清貞簡靖非時輩人也僕與主上面相商確親奉御筆點用僕卽叩頭賀曰皇上聖明不遺遐遠如此爲人臣者孰不思竭力以晷報乎第以渠素未留心銓事又值文選君迂暗而不達於事理致

有一二錯誤然皆小事於大節未有失也而遂群起而攻之使之不獲一展又如臺長之古心卓行處之總憲最爲宜矣乃近南中亦有物色之者書曰無侮老成人皤皤良士膂力旣愆我尚多有之宓子賤治單父孔子使人覘之見與老者二十餘人議政孔子喜曰吾知不齊能辦單父矣今以 幼主當陽而朝多長者豈非盛事乎而奈何務欲侮詆之也張進本一火者耳酒潑放肆送內守備笞撻之革其管事法如是足矣卽下之於理亦不過問擬不應止耳而紛紛論列何爲者哉且凡臺諫交章必相與爭 國家

大事關係理亂安危者今以一酒醉內官而南北臺
諫闕然並論又何爲者哉隋珠彈雀群虎捕羊殊可
咲也乃致主上生疑盛怒而諭僕以人爲欺已
嚴旨忽傳使僕措手不及本欲爭體面反以致君
疑所爭何有智者固如是乎然此非臺諫諸君之過
也聞有一二大臣覬銓臺而不得者播其說于南中
聽者不察輕事置喙而不知僕之苦于調維也煩公
幸明語諸君今朝廷清宴中外又安倖門塹塞百
官奉職如是足矣僕之淺薄亦僅能辦此耳若更欲
求過于數者之外則僕不能主上初冲本無差失

引大岳文集 卷二十一
而政令之行動見齟齬或事已處分爭勝不已甚至
挑禍起釁以結怨于中人一旦上下相疑南北冰炭
而後責僕以維持周全之僕亦不能辱在道誼素知
敢布腹心幸惟裁鑒

答延鎮巡撫張太石

頃面奏主上延鎮所修邊工與常不同公杖履跋
涉身親督工故特遣兵部司屬往勘冀獲實也主
上睿明事事覈實振舉邊事之機實在於此

答甘肅巡撫侯掖川

西涼重鎮必仗雄才辱華翰知已履任視事無任欣

慰頃巡按所報賓兎事據王鑑川公言此俺酋之少
子內兎寄居西海者乃內兎非賓兎也頃已傳諭俺
酋令其嚴加戒飾然制虜之道惟當視吾脩之修否
服則懷之叛則禦之得其好言不足喜得其惡言不
足怒也開市一節望公熟計而審處之竊以爲此地
見與番人爲市何獨不可與虜爲市前任廖君執泥
而不達於事變其言不可爲市不過推事避患耳非
能爲國家忠慮者也但彼既有不遜之言在此時未
可便許且俟俺酋戒諭之後果帖服無言待其再乞
然後裁許則綏懷之恩出於朝廷而非由於要索

矣巡按所云不過據各將官傳報亦未可便以爲實
且從旁議論與當局者不同朝廷以邊鎮之事專
任公等其操縱機宜公宜悉心經理爲國家審圖
主上英明斷而行之非浮言所能挫奪也

答薊遼方金湖

薛武

辱教邊事虜情誠爲高見遠識今在廷之臣能爲此
言者指不一二屈信吾黨之有人也敬服敬服據鑑
川言甘肅求市者乃掩箇之少子丙兔寄居西海非
賓兔也夫甘肅既可與番人爲市何獨不可與虜爲
市前任廖子執閫而不達於事其言不可與市不過

推事避患耳非能爲國家忠慮者也頃已示意侯君
令其審處但彼既有不遜之言此時未可便許且令
俺酋戒諭令其悉心效款待來歲再乞然後許之則
綏懷出於朝廷而非由於要脅矣公亦可以此意
密語順義使之知所從事又聞大同甚饑來春不知
何如若果艱食公亦宜爲之請賑今邊倉頗有積穀
可以備賑固不必索之帑儲也苟可支持則已之

答滇撫羅野亭

辱華翰領悉泰東客死無後天之報施善人何如哉
僕忝同榜爲之經理後事情理宜爾何德之有

與河道傳石川

近聞淮揚士大夫言海口益淤以故河流橫決四溢
今不治則河且決而入於江維楊之區皆爲巨浸矣
下議築遙堤爲不便者其說皆信否從未行
此道不知利害所歸望公熟計其便裁教幸甚

答兩廣殷石汀計招海寇

辱示鳳賊事前聞閩人招之已久殺矣近又有出洋
之報僕竊料此賊目前恐未可得何者閩廣之人皆
欲要以爲己功爲閩人者必將曰汝無歸廣廣中名
爲招撫實欲殺汝也爲廣人者亦必曰汝無歸閩閩

中名爲招撫實欲殺汝也故賊疑而不決歸漢歸楚
莫知適從反使狡賊得以其間而納吾接濟之人求
其必用之物久之復開洋而去何處覓蹤是我以招
撫誘賊而賊亦以招撫啗我非計之得也僕願廣中
俱勿以招撫爲名但嚴兵以備之禁海上人勿與接
濟今公在廣料彼不敢輒肆彼不得入廣必走閩却
令閩人招之或可得也閩廣皆在疆域之內但欲得
賊耳何必以出於已乎且倚之逐之其功亦自有不
容掩者然僕所爲必責之閩者蓋以此賊舊只於廣
中作賊閩人未罹其毒今使廣人得之不殺則無以

洩地方之憤殺之則廣賊見聽招者尚多將令反側者不安若閩人得之則殺之不爲失信赦之不爲失刑且料賊之心亦頗信閩而不信廣也惟公與金大叅密計之此所謂以與爲取者也梧州塩稅公事所處一一精當已下所司議行

又

西省通塩不惟於軍儲有濟且府江一帶咸有兵船往來亦可以彈壓狂人通蒼梧之氣脉誠百世之利也今雖不用軍衛舟中亦宜量貯火器陰寓武備方可大疏已下所司一一覆允

答蜀撫曾確菴計都蠻善後事

都蠻未平之先蜀中士大夫求免其毒害而不可得
今旣克復遂欲窺其土田而有之此私情之難徇者
也衆蠻殘孽當其降服之初乘吾兵威分北而散豈
之爲力甚易今已一年餘矣彼旣戀其故土又曾許
以撫懷乃一旦欲別處之禍萌當自此生矣仍宜懷
之以恩義久任劉顯以彈壓之數年之後人情定帖
畏威懷惠皆吾赤子矣蜀人有倡爲餘黨未盡之說
者皆欲利其土地耳公宜熟計其便毋徇人言坐墮
前功

張方集 卷二十一
答方金湖

西事前已示意侯君想當有處觀西鎮諸君書云云則順義已經戒諭諒無他虞但諸君之告公固如此而騰之章奏寄諸部科者往往不同大抵皆預捏危言以爲他日避罪之地耳人臣懷二心以事君非忠也所示諸書留以爲證

答殷石汀

往府江之役以未經勘覆久稽論報茲榮晉樞卿澤言酬錄未足以當功也近報倭警似非其時且越惠潮而犯嶺西亦非其地恐別賊假託之也向者欽州

云云適與此符惟公熟籌之

答傅后川議河道

辱云治河議一一領悉但據公所言皆爲未定之論
海口旣不可開遥堤又不必築開泃口則恐工鉅之
難疏草灣又慮安東之貽患然則必如何而後爲便
乎願聞至當歸一之論入告于上而行之

答薊鎮王巡撫

長禿生擒亦制長昂之一機幸惟留意審處務使之
畏威懷德可也薊中羽翼未就未可高飛此輩不得
不羈縻而用之但須審察順義之情以爲制馭之術

耳

答薊鎮吳環洲

聞俺箇病甚有如不起則疆場之事不免又費一番
經理黃箇近日窮居塞外動靜何如將來局面當作
何狀今宜預思所以處之之術又屬夷長昂三貢不
入屢在邊外捉人挾賞昨薊人捕得其叔長禿卽欲
斬以報功僕聞卽使人止之令其借此以制伏長昂
若彼能服罪補貢誓不再擾亦卽赦而弗誅照舊撫
賞但長昂與青把都爲婚幸公示意青箇令其傳意
長昂輸誠效順勿復作反自取滅亡蓋薊鎮近日撫

賞視昔不同皆僕爲之處畫其段布諸物皆美好堪用者到卽給賞而邊吏只畏法賊情大小必以上聞得賊必殺或啓釁端須得諸夷守約彼此相安則薊患永紓而西虜之貢市益堅矣

答兩廣殷石汀

鯨鯢盡戮地方敎寧公之功可能也驅見在之兵當率然之變在自戰之地禦必死之賊兵不別調役不淹時而全師奏捷其功不可能也廕賚之典尚未足酬簡在帝心大畀有日

答吳環洲

辱示薊鎮虜情淵哉其言之也已卽密語彼中當事諸公俾知所從事屬夷處置適宜則土虜之真情可得而兩鎮之貢市愈堅當今邊務莫要於此矣公在上谷內修戰守外探虜情東制西懷自有妙用僕復何憂

答少叅吳道南

頃者喬轉僕雖不預知然部意亦非薄也願執事且戢翼卑栖翻飛固自有日也難將之說數年以來實聞之蓋以馬趙宿將一則屏棄灞亭一則抑鬱而死咸謂意出於執事區區竊以前用執事於上谷固以

二將奉托豈謂反陷之耶故雖言者屢至終不信也
今事亦已矣願努力建立以副鄙望

明刻張太岳先生文集卷之二十六

今幸亦已矣願後代數立以福猶望

二殊奉升豈謂又謂之耶姑垂言者曩至然不謂也

新刻張太岳先生文集卷之二十七

答薊鎮總督方金湖

夷酋旣已悔罪乞哀宜開其自新之路公處之極當
機宜又因而稽覈撫賞一事尤爲邊政實務辱教領
悉

答河道總督王敬所

開河之策議在必行但以事體重大且此中有言其
費度七八百萬乃足者豈其然乎故請差科臣會勘
徒以息啾啾之口耳此事先年諸臣亦知其便利獨
以艱大之任憚於承肩今公赤忠身任其責更復何

疑願堅持初意勿奪羣言其中事體亦須詳慎期在萬全無害可也俟差官行再當請教

答兩廣總督殷石汀

別楮云云其人亦素愛其才故薦之於公後乃知其狂躁險刻矜已凌人不可大用故昨因其稱疾遂決去之然公自此更不必置之齒頰矣廣右今已大定聞西省自府江平復道路開通客旅無阻梧州之鹽方舟而下南交通貢貿遷有無桂林遂爲樂土此誰之功歟蓋粵人今日始知公之不可一日去也

答少叅吳道南

辱教款虜錄紀獎借過實且感且媿別楮二將事鄙
懷久已洞然往事不足深論也此後願益務以善養
人爲國惜才以充其與物一體之量則目前道路自
然開通虎狼夷狄無不可處何至齷齪疑慮若無地
自容耶

答應天巡撫宋陽山

辱華翰一一領悉里甲經催投靠優免四者正吳人
受病處然所以養成此病至沉痾而不可療者實陳
周二子爲之今丈一旦砭之以精覈之石投之以經
制之劑宜其苦口刺腸而不能堪也然事極必變勢

窮斯通吳中事勢已極理必有變今得丈稍稍振刷使知朝廷法紀之不可干上下分義之不可踰汰其太甚而無至於踳盪橫決而不可收拾則吳尚宜尸祝公以報德而可以爲怨乎嬰兒不剃頭則腸痛不剃瘞則浸疾然剃頭瘞固不能止嬰兒之不啼也近來彼中人不獨側目於丈且推本於僕造爲橫議欲以揜憾國是如昨南余云云意皆有所由來故不得不創之今上意已定正論不揜丈宜自審畫無爲山鬼所惑陳乞云云決不能遂徒多一番舉動耳史周文卷已解部訪知其中頗有造作皆舊時胡

衷二子爲之頃者邵君止據舒王二道之查呈而舒王亦不知爲贗也然僕于此亦不敢刻意深求今但有楮筆可據卽可藉手以爲解脫之地况其人已死比之見在盜公帑爲富翁者有間自宜從寬以處之也

答甘肅巡撫侯掖川

西涼重地番虜雜居措畫稍差便成乖阻往嘉靖初年賴建菴晉溪二大老經略數年而後定近廖公以節士之槩當邊閫之任非其宜矣比薦公於上或有言公好以智自免不肯任事者茲奉翰教措畫周

詳音旨慷慨用智者固如是乎且今英主御極名
實之辨較若黑白闔外之議悉假便宜不從中制智
者不以此時取旂常鍾鼎更復何俟以是知談者之
妄也

寄石麓李相公

不奉瞻對五易春秋諒翁念我亦如我之思翁也別
後無可奉聞者唯平生所與共許委身致主之義則
不敢有一毫有負于久要獨此庶可少慰尊懷耳但
第以菲薄廻翔廊廟而翁以重望獨淹留林壑揆之
古人彈冠之誼殊用歉然贊郎以庭闈念切特假一

差省覲便中草草附候別具侑柬統惟鑒納

答河漕舒按院

頃者議開泃河特爲轉漕計耳其於河政自有常規
民患何嘗忘念淮揚士民乃遂謂朝廷欲置黃河
於度外而不爲經理豈其然乎大䟽已下部議覆

答應天撫院王古林

巡撫一方將盜是務除而誘人爲盜盜焉可弭公職
專整飾戎備爲民除害宜如鷹鷂之逐鳥雀又何畏
焉況今朝廷大明當天幽隱畢燭流言浮謗舉不
能行亦自無可畏也賤日厚禮槩不敢當統惟覽亮

答吳環洲

辱示虜情宛若指掌至謂虜酋假虛聲以要賞邊將
信訛傳以希功二語深中時弊今人可與籌邊事者
獨公與金湖公而已與他人言頗似說夢雖識或不
逮亦有呆裏撒奸者昨奉嚴旨督責當無所容矣

答山西撫院鄭範溪

前有貴戚自晉中來言礦賊事僕得因面奏寢一大
役公又因之解散其黨俾地方寧靖事機禍福之變
安有常哉辱華翰知己履任甚慰

答浙撫謝松屏言防倭

浙無倭患久矣一旦聯舟突犯必有勾引之奸且地方安恬日久驟尋干戈恐無以待寇幸激以忠義鼓以賞罰悉力一創之庶將來不敢再窺亟剿此寇然後徐究其禍本而除之可也浙人咸云謝公非用武才恐不能了此事僕曰不然謝公沉毅有遠慮賊不足平也願公勉就勲庸以副鄙望

答應天撫院宋陽山言防倭

近年海寇息警人心頗懈僕竊以爲憂故昨年擬旨申飾賴公偉略起而振之今果能一戰而勝之不俟登岸而遏之於外洋功尤奇矣天下事豈不貴豫

哉慰甚彼前鋒旣折必不敢窺吳禍當中於浙矣黃副總乃僕武舉所取士其人才志似亦可用但負氣不能下文吏若少假借而用之或亦可當一面也

答吳環洲論邊臣任事

適上論詰本兵虜情虛實之由卽日奉翰教讀之旨哉其言之也上谷得公隱然如長城僕內奉宸宸外憂邊境一日之內神遊九塞蓋不啻一再至而已奈何邊臣故套難改鮮有爲國家忠慮者而無識言官動卽諫白及與之論邊事一似說夢近有一科臣聞遼虛報遂欲防守京城浚濠塹掘戰坑以禦虜

者虜在何處而張皇如是使人悶悶此疏若行豈不
遠駭聽聞取笑夷虜已奏 上留中寢之以泯其迹
孤才一身無可與計事者故每得翰示輒說懌竟日
非喜其說之同已也喜其有助于昏昧也然不敢舉
以告人恐忌者遂及目于公乃知大舜隱惡而揚善
亦有不可行於今者矣人臣不忠人心不古可歎自
今東西虜情的有所聞仍望密以見示其中情變無
常亦不必定以今日所言爲是所聞爲的也僕求助
之意真切懇至幸惟亮之揭稿一紙寄覽仍希擲還
近聞有瞽目愚術人在邊溷擾訪有指稱假托者幸

卽擒治之仍明示諸將士僕從來不薦達此輩勿爲所誑也

答陝西督撫石毅菴

沙麻之事雖由於二將不和軍心不一然自古未有千里襲人越險無繼而能成功者今其事已結似難中止然亦須沉機審發期于萬全固不必期效于旦夕也今之時政與先年異公受分陝之寄凡事當守便宜謀定而後發亦不必汲汲求解于群議也

答三邊總督論番情

石公前爲宋御史所窘急于圖功以解群議遂輕用

弗詢之謀遽爲掩襲之計致損威傷重殊可恨惋大
抵西之番族廣之狴獍事體畧同狐鼠鼯鼯潛伏岫
林穴居險阻非可以力勝者也制禦之法惟當選任
謀勇將士修險阻明烽燧責成近邊熟番遠爲哨備
厚其賞給約束沿邊軍人無容勾引番人交易固利
有警務先覺預備奮勇追逐必令挫折則熟番皆畏
威懷德而生番自不敢犯今不思以計勝之而輕用
不教之兵深入嶮阻之地雖微二將之隙亦鮮有不
敗者此事在軍門爲近撫臺隔遠難於調度可語石
公前事已如此今須慎重審發不可以嚴旨責成

人言旁指遂爾惶恐復爲輕動日今天暑草木蒙密
道路崎嶇恐難進兵總兵人馬亦不須西駐枉費糧
餉且只守險設伏以待不虞責罪熟番發其陰私誘
以厚賞爲我哨守待秋冬水凍林疎然後相機進取
或明出以示兵威或掩襲以攻不備必有奇道乃可
制勝然但一創之以洩邊人之憤足矣固不能草薶
而獸芟之矣聞番人恃茶以爲命湏嚴土人通番之
禁使私茶不得出則我得制其死命至於番功之賞
不過數金誠爲太薄今宜比照倭功例稍厚其賞庶
人肯用命也凡此皆書生遙度之言未知果當機宜

否漫附以備採擇焉

答按院陳公文衡覈事實

辱教其人乃前院論劾今但當察其事之實否不必問其曾得罪於何人也諸葛孔明云吾心如秤不能爲人作輕重僕亦菲薄謬膺重寄事無大小必默告於天地祖宗列聖而後行豈敢以已意爲輕重哉

答少叅吳道南

以善養人與物一體皆執事所習聞者衣中繫珠不尋自獲富家乞子忽復來歸滿中七寶受用無量在

引大書卷之三
執事自取之耳盟諸我不若自盟之爲切也

答督撫張崱崿

往公以太君思歸奉輿西返僕所以不阻者亦欲因此息忌者之喙耳今公論已定以素所負蓄屬休明之會不於此時取旂常鍾鼎更復何俟且棄瑕雪垢不避嫌忌而薦賢者惟僕爲然後之人或不如是之愚也已大疏部已報寢幸卽戒途以需簡畀

答石麓李相公

侔來辱翰貺深荷雅情及備詢起居萬福復慰懸仰弟自首事以來於茲四稔碌碌無以自效所賴主

德日明宮府清肅百司奉職邊陲少警一二黠肆干
紀者咸就誅夷仰惟宗社闡靈孚佑聖主而第
以淺薄會逢其時優游苟祿竊餘榮以自被殆有天
幸焉顧值休明之會俾耆德碩望遺置在野不能引
薦深用媿嫌耳賢郎請告謹遵命屬所司覆行別具
侑柬統惟鑒存

答閩撫劉凝齋

林賊旣已入彀果不出閩人得之之料喜甚喜甚但
當其時卽宜少出閩師以助之夷情多變死賊圍久
或生他計諒此時成敗已決矣傾耳以俟捷音

答雲南巡撫王毅菴

辱示知旌節已入滇視事欣慰儂賊事旣原無大故
自宜相機撫處颺颺狐狄之區得其地不可耕得其
民不可使因俗爲制使不爲大害而已何爲輕動大
衆以事無益耶簡靜行事協和總戎此二言者望公
終納之前院舉劾殊可咲該科亦有劾疏通俟事寧
併處也

答督撫吳堯山

往奉別時記公有不薄南遷之語故以借重然亦暫
處耳憶昔悠悠之談若謂僕有所不足于君所者今

公視鄙心何如哉大疏既不獲請簡書有嚴幸過發
仙舟以副輿望

答省中羅涇坡論士風

僕自受事以來惓惓勸喻今士大夫務以忠肝義膽
事君誠心直道相與近雖稍變舊習而餘風未殄執
事謂外吏猶事趨謁驚虛文誠然所示二縣令已卽
投之囊中矣讀華翰具見留心民事詩曰人之好我
示我周行執事有焉敬拜以受

答河漕劉百川言開膠河

膠河之可開凡有心於國家者皆知之獨貴鄉人

以爲不便皆私已之言也讀大疏具見忘私徇國之忠已奉 旨允行又承教鳳竹公肯身任之猶爲難得今卽以屬之漸菴亦曾有書云開泃口不若疏膠河故宜與之會同且委用屬吏量派夫役亦必借其力以共濟也至於一應疏鑿事宜及工費多寡俱俟鳳竹公親履其地次第條奏其河道官屬錢糧俱不必與之干涉以破其棄河不治之說庶浮言不能興大事可就也

答河道徐鳳竹

膠河之可開凡有心於 國家者皆知之乃竟爲浮

議所阻者其端有二一則山東之人畏興大役有科
派之擾又恐漕渠一開官民船隻乘便別行則臨清
一帶商販自稀此昔年之說一則恐漕渠旣開糧運
無阻將輕視河患而不爲之理此近年之說也凡此
皆私已之言非公天下之慮也今當決計行之無事
再勘僕嘗念此惟以不得任事之人爲慮昨奉百川
公書公雅不辭勞審爾大事濟矣已卽面奏於上
特以屬公前得山東撫臺李公書謂開泇口不如
疏膠河意與公合故宜會同且委用屬吏量派夫役
亦必借其力以共濟也諸疏鑿造船事宜及工費多

寡俱俟公親履其地一一條奏其河道官屬錢糧等項俱絕不與之干涉以破其棄河不治之說庶浮言不興大工可就也夫世必有非常之人然後有非常之功然又必遇非常之時而後其功可成故曰非常之原黎民惑焉今主上英明天啓志欲有爲而公以非常之才適遘此時可不努力以建非常之業乎大功克成當虛揆席以待

答山東撫院李漸菴言吏治河漕

辱華翰所示具盡事理讀之無厭竊聞致理之要在於安民欲民之安責在守令今主上年雖冲紉已

知注心邦本然而上澤未能下究下隱未能上通者
則以吏治欠覈而骹權撓法之豪詭銜竊轡之奸鯁
乎其中故耳易卦頤中有物必嚙之而後合故今振
舉綱維精覈吏治章之以雷電懸之以象魏要在嚙
其物去其鯁使上澤得以下究下隱得以上通而已
二州佐旣堪其任何愛兩知縣而不以勸天下之能
者且提調學校特縣令下事耳當此罷邑民救死不
瞻奚暇治禮義哉況上有府佐下有學官歲時考校
亦自不妨也鬻爵誠爲弊政昨計部稍去太甚者然
未能盡拔根株俟一二年後將鹽法屯田經理就緒

內外儲蓄少充當盡罷之考成一事行之數年自可
不加賦而上用足今計開納所入歲不過四十萬稍
加劑量致此固無難也向承教膠河事時方議鑿泇
口未遑論也今泇口旣罷劉徐二司空復議及此適
與公議合故特屬之望公協恭熟計共濟此事僕以
淺薄謬膺重寄主上虛已而任之自受事以來晝
作夜思寢不寐食不甘以憂國家之事三年於此
矣今朝廷大政幸已畧舉惟漕河宗室未得其理
宗室事鉅不敢輕動尚當有待漕河則宜及今圖之
了此一二大事僕卽納筦鑰稽首歸政乞骸而去矣

千金之裘非一狐之腋所望海內英哲共助不逮

答薊鎮總督方金湖

順義饋馬效順彌堅真 朝廷之福也書中言守邊
五年欲乞賞賚似亦可從俟其貢市畢可爲之一請
僕所酬一如去歲例俟其至邊與之

答滇撫王毅菴論夷情戒多事

滇中自嘉靖以來屢嬰多故其初皆起於甚微而其
禍乃至于不可解窮荒絕徼之外得其地不可耕也
得其民不可使也而空費財力以事無益使無辜之
民肝腦塗地不仁哉前人之所爲乎今仗大略撫定

引大... 卷二十一
造福于遠人多矣此後惟一務安靜嚴禁軍衛有司
毋貪小利逞小怨以騷動夷情則可以高枕卧治矣
辱示曲盡彼中事理嘆服綿紙既可用以題奏何不
可爲書柬乎外雲南歲貢金舊皆一次解進今分兩
次似爲煩費此後若辦足仍作一次解進何如惟裁
酌之

答甘肅巡撫侯掖川

甘肅開市已奉

諭旨悉如所議其中有難遙度者

公自以便宜行之務令事久邊境獲安而已市場似
宜稍西去西寧太近則啓賓鬼壟斷之心去我邊太

遠則迂邊民交易之路春市虜馬瘦弱強爲之市終不便也統惟裁酌

答列卿楊本菴

向承以令先公隧銘見屬媿不能文又冗甚故遷延至今蕪劄雖不足以發揚令先公之盛美然道僕平生所與令先公同心許國之誼則實無一字不出於肺膈也百世之下考古尚論者必將有徵于斯言辱惠佳帳祇領餘不敢當輒璧諸使者

答山東巡撫李漸菴

膠河之議非一日矣咸以謀多築室人鮮同心故幾成

而罷今幸劉徐二公發端任事公與商道長協心爲國底績之期可以預必乃知就大畧艱固有時也所示疏濬道里宛在目前若如陳君所呈更爲徑易不知按視何如徐公有來期否

答總督方金湖

順義酬幣旣不中格謹領入聞今歲各路貢市比之昨年尤爲歛戢足徵虜效順之堅公籌略之遠也慰甚慰甚陳子論張叅議詳其語意似非至公而銓部不待巡撫之疏輒與題覆亦非事體故昨 旨以議擬不合爲詞下巡撫再勘實駁之也繼得華翰及鄭

公䟽則多惜之之語乃知再勘之 旨於事理允當
如有枉誣宜與昭雪 明主懸衡以運天下如日之
照臨是非賞罰惟一付之至公不宜依違兩可之詞
也

答河道徐鳳竹

承華翰知道從已臨東土無任欣慰大䟽下所司一
一覆允此事甚鉅費必不貲今欲爲 國家建萬年
之利寧敢惜費但齊魯之人甚不樂興此役以近
旨嚴切雖不敢明肆阻撓乃其心則終不以爲然故
凡言此事必幾萬幾十萬而後可舉者未可遽信之

也公宜與有心計誠心爲國者熟圖之近來朝廷之上事事精覈凡有興作比之先年率費半而功倍則虛實不同故耳願公計慮審定然後次第請旨行之

答司馬王西石

張主簿人來辱翰教深慰遠懷向者之處惟欲曲遂高志然于僕本願終違蔽賢之罪終不可追也學湏到形不愧影此聖門教人慎獨之功此工夫最難以公高明自能徑造直詣如僕淺劣因公之教亦益加深省也陽山光明磊落初時吳人甚不便之近返感

慕稱頌蓋至誠未有不動者遼左頃復報大捷雖斬
馘止二百有餘然奔溺于河者甚衆河水爲之不流
盡棄輜重而遁所鹵獲駝馬噐物不可勝計足以紓
邊人之憤而寒旃裘之膽真大快也諒公所欲聞者
謾以附及講章先刻完者附覽

答閩撫劉凝齋

屢辱翰示及別楮所云一一領悉頃聞有貴恙無任
懷念想勿藥矣近據閩廣所報賊形皆潰亂奔竄之
狀鳳賊似不在其中斃於呂宋之說恐不虛也果爾
皆閩人之功若非遣謀行間彼番人安肯殲之乎今

引大岳文集 卷二十一
想已有的耗頃耳以俟捷音之至

答兩廣督撫凌洋山

辱華翰知已榮代視事無任欣慰前聞中屢報鳳賊
爲呂宋番人圍困何得突犯廣中據報賊形若潰亂
奔歸者鳳賊恐不在中幸公細察之若此賊果在其
衆旣散必成擒矣羅盤賊旣已奏聞勢不能已但
須審計熟畱之昨部覆又推原題未盡之事似亦可
行大約廣中武備不可一日弛與內不同振軍聲伐
不服以鎮壓蠻夷之心有不能一付之安靜者惟公
裁之

寄趙大洲相公

賢郎謁選辱華翰深荷遠念僕以孱弱謬膺重任每
懷將伯之助莫挽東山之轍側身西望惆悵而已所
幸主德日新精勤問學宮府清宴方內又安此九
域簪紳之侶所共欣躍而稱慶者也翁素抱忠耿知
在林里未忘朝廷故謾以奉聞賢郎尚差歸省便
此附候別具奏稿一部圖說一部及薄幣二端侑柬
統惟鑒原

答劉虹川總憲

天下事有欲速而返遲求得而顧失者公是也公昔

在郎臺有惠政無端被誣世所共惜薦言屢至召用
有期公乃急于求進若不能須臾少俟者異時撫臺
有缺僕卽以公屬之銓衡乃當事者對言此公才信
可用獨無奈其竿牘頻仍本部以是引嫌不敢用之
而僕自是亦默然慙阻不敢復言公事矣此非所謂
欲速而返遲求得而顧失者乎方今明主在上方
博蒐賢雋以興太平之治僕之求士甚于士之求已
雖越在萬里沉于下僚或身蒙訾垢衆所指嫉其人
果賢亦皆剔滌而簡拔之其爲賢者謀也又工於自
爲謀公聞之往來之人豈不誠然乎哉胡乃不以賢

者自處以待僕之求而用市道相與餽之以厚儀要之以必從又欲委之于私家陷之以難却則不知僕亦甚矣古人言非其義而與之如寘之壑中誠不意公之以僕爲壑也以公夙所抱負又當盛年固時所當用者此後闔門養重靜以俟之弓旌之召將不求而自至若必欲如流俗所爲舍大道而由曲徑棄道誼而用貨賄僕不得已必將言揚于廷以明已之無私則僕旣陷于薄德而公亦永無嚮用之路矣是彼此俱損也恃在夙昔至契敢直露其愚惟公亮而宥之幸甚

答督撫吳環洲言敬事後食之義

辱翰示一一領悉卽屬本兵爲之曲處但有功必叙
有勞必酬者 朝廷厚下之仁敬事後食先勞後祿
者人臣自靖之義若銖銖兩兩計功程勞以責望于
上似非所謂懷仁義以事君者也僕以菲薄待罪政
府每日戴星而入朝不遑食夕不遑息形神俱瘁心
力并竭于 國家無尺寸然自受事以來力辭四廕
獨守舊官每一蒙 恩輒夔夔慄慄不能自寧非矯
也誠以 國恩難報而臣子雖鞠躬盡瘁不過自盡
其所當爲本無功之可言也公所欲爲諸君處者自

是鼓舞用人之道而區區所云似亦爲人臣之所當知也冒昧吐瀝惟高明采之

答兩廣凌洋山

閩中撫按有書至甚以廣議招撫爲非此固一隅之論然亦宜審觀賊勢何如據前所報鳳賊似未必在其中若果係殘黨入境又未肆殺掠則招而分北之事理當然不爲失策若賊首尚在敢行侵掠則宜與閩帥夾剿之今不揣賊情強弱向背而執言撫剿皆偏見也今想已大定人旋附布區區

答薊鎮巡撫

頃遼左之功固奇然本之以公密報土酋東犯的耗僕因而傳示該鎮潛形而預待之故有此捷論其發蹤之功公宜首叙顧僕于此不敢冒竊遂使大功不彰也

答隴右大叅李冀軒

辱華翰得悉隴右事情甚慰懸慮畚賊事不專在用兵貴於善處古人有以一介之使當十萬之師者當機故也蘭州倉場稍弊不獨寄貯民間殆并民間所貯者亦爲虛數官司積棍與奸商相通冒領官銀並無釋易每有調遣則賄囑將官量以布米等物給軍

隨卽銷除以一日爲二三日者有之以一千爲二三
千者有之蓋其弊久矣茲旣清查重處乃振弊維新
之會凡有所當行者計處已熟可呈詳督撫題奏庶
該部便于議覆也

答傳諫議

往者別時曾以守已愛民四字相規故屢辱厚惠俱
不敢受蓋恐自背平日相規之言有虧執事守已之
節而執事乃屢却不已愈至愈厚蓋以區區爲嫌少
而加益耶至于腰間之白尤爲殊異顧此寶物何處
得來恐非縣令所宜有也謹仍璧諸使者若假之他

人可令返趙執事從此亦宜思所以自勵焉

答河道徐鳳竹

膠河已有成議雖費亦不敢惜其中䟽濬事宜及調
用有司等項俱聽便宜處畫一毫不從中制乃聞近
爲羣議所苦頗悔昔者建言之爲易審爾則此事難
以望其有成矣僕聞疑事無功疑行無名 明主方
勵精畧治詢事考成豈直以未定之議嘗試 朝廷
哉神禹大智猶必親乘四載遍歷九土至於手足胼
胝而後能成功方其鑿龍門之時民皆拾瓦礫以擊
之蓋衆庶之情莫不欲苟安于無事而保身自便者

孰肯淹留辛苦于泥塗橫潦之中此衆議之所以紛
紛也願公庄之以剛斷持之以必行心乎爲國畢
智竭忠以成不朽之功凡粘帶顧忌調停人情之說
一切勿懷之於中又親歷工所揆慮相度分任責成
若殫勞不親細事徒寄耳目於人則紛紛之議將日
聞于耳雖勉強圖之亦具文而已決不能濟也幸公
熟啗之若果未能堅持初意恐拂衆心則亦宜明告
於上以謝昔建議之爲非而後重負可釋耳此
國之大事不敢不盡其愚幸惟鑒宥

新刻張太岳先生文集卷二十七

而力大不

其數受不縣縣事封寄耳目令人領條條之精執日

一時以對之使中又縣聖工而對憲休製令其責如

督院忠以氣不味之也凡味帶願思國新人制之始

條出願公主之以調調耕之以必行以平謝 國畢

懷昔我留辛苦于我全蘇蘇之中此衆藉之而以此

新刻張太岳先生文集卷二十八

答應天巡撫宋陽山

去歲海洋之捷誠爲奇勲榮晉一秩未足爲酬尚當
有崇擢焉辱示諸款手讀數過俱見鴻猷驛遞一事
近例頗嚴人似無敢犯者大抵爲政必貴身先頃小
兒回籍應舉自行顧倩昨冬遣僕歸壽老親身負儀
物策蹇而行蓋不敢身自犯之也目前民困已覺少
甦數年之後積餘必多用以糴穀備賑誠善政也織
造事值浙中亦有疏陳乞故司空不敢減此益彼姑
以料價抵補然此旣分四運則目前已自足辦一二

年後公私稍舒了此似亦無難也細觀別冊向來夙
弊釐革殆盡估價亦與近日言者迥異足以見丈於
諸事靡不罄竭心力矣優免核則投靠自減投靠減
則賦役自均數言已盡查完停妥宜卽具題施行水
利之責御史昨凌洋山始建此議僕固以爲未便乃
渠則堅求必遂故弔勉從之今奉教信爲冗設也巡
撫之理漕徒增文移煩擾佚差官時酌損之

去
答總兵戚南塘

本兵譚公問足下與閔視大臣相見之禮云宜

蒞彼聚水見督府可也竊意今日當以 欽命爲重

不在兵銜之有無謙以自處見者自然悅而敬之其
差去部公當預爲足下先容必加優禮決不以庸衆
相待也

答閩撫劉凝齋

閩師千里赴難雖無所獲猶當論功况斬馘黎丹灼
然耳目者乎廣人欲來招撫之議忘大德而逞小忿
曲有所歸矣 聖明遠見萬里功罪賞罰不爽秋毫
本兵已覆勘議幸公勿以爲介但鳳賊存亡尚無的
耗仍望公之留意也

答松谷陳相公

伏承台翰腆賜捧讀再四如坐春風不知燕蜀遼闊也備諗起居清勝身處雲林望隆朝野慰仰慰仰不肖猥以淺劣謬膺重任顓蒙之見竊以爲旣受一國重託宜以死報故二三年間諸所措畫惟以振紀綱剔瑕穢爲務以是見怪於流俗本之德薄位尊力小任重其見詆誣非不幸也卽欲引決乞骸以主思深重昔所許於先帝者尚未克酬故復覲顏就列屯難之際思我同心恨不卽弋冥鴻招翔鳳而致之廊廟也

答奉常陸五臺論治體用剛

往丈起山中不一歲而躋九列僕日夜引領望丈之
一至者以丈素有超世之識知僕所以肩鉅承艱之
心爲能䟽附後先以共濟艱危也乃讀前後手翰所
以教僕者則亦未越於衆人之見而與僕之孤耿大
謬也丈前書謂僕處余懋學傳應禎爲太過恐失士
心後書謂救劉臺爲盛德至引文潞公之事以相比
今海內簪紳之侶投柬於僕者十九爲此言也然皆
衆人也豈意有超世之識又知僕所以肩鉅承危之
心而所見乃亦止此乎古之賢聖所遇之時不同而
處之之道亦異易大過棟撓豕曰剛過乎中當大過

之時爲大過之事未免有剛過之病然不如是不足以定傾而安國棟撓而本末弱矣伊周當大過之時爲大過之事而商周之業賴之以存雖剛而不失爲中也僕以一豎儒擁十餘齡 幼主而立於天下臣民之上威德未建人有玩心况自隆慶以來議論滋多國是靡定紀綱倒植名實混淆自僕當事始布大公彰大信修明 祖宗法度開衆正之路杜羣枉之門一切以尊 主庇民振舉頽廢爲務天下始知有君也而疾之者乃倡爲異說欲以抑損 主威搖亂朝政故不得不重處一二人以定國是以一人心蓋

所謂剛過乎中處大過之時者也而丈乃以爲失士
心誤矣吾但欲安 國家定 社稷耳怨仇何足恤
乎至於潞公之事亦復不倫蓋潞公所事者長君而
其出處去就未必係宋室之安危子方狂妄後生獨
持饋錦一事以議論前輩此其失在於不知賢耳故
潞公得以包容之僕今所處何時也 主上舉艱鉅
之任付之於眇然之身今權璫貴戚奉法遵令俛首
貼耳而不敢肆狡夷強虜獻琛修貢蹶角稽首而惟
恐後者獨以僕攝持之耳其出處去就所係豈淺淺
哉彼讒人者不畏不愧職爲亂階且其蓄意甚深爲

謀甚狡上不及 主上旁不及中貴而獨剗刃於僕
之身又無所污鱗而獨曰專擅專擅云云欲以竦動
幼主陰間左右而疑我於 上耳賴 天地 宗廟
之靈默啓 宸衷益堅信任不然天下之事豈不爲
之寒心哉自有此事 主上食不甘味寢不安席以
痛恨於忌者盖大舜疾讒說之殄行孔子惡利口之
覆邦故去此人以安僕也以安社稷也離明允斷誠
理法之正而僕所以懇懇救之者盖以仰答 聖恩
下明臣節耳非欲爲沽名之事也而丈乃以潞公兄
諷誤矣僕一念爲 國家爲士大夫之心自省肫誠

專一其作用處或有不合於流俗者要之欲成吾爲
國家爲士大夫之心耳僕嘗有言使吾爲劊子手吾
亦不離法場而證菩提又一偈云高崗虎方怒深林
蟒正嗔世無迷路客終是不傷人丈深於佛學者豈
不知此機乎夫士屈於知己而伸於知己今海內
縉紳之侶爲此言者甚衆僕皆遜而謝之乃於丈曉
曉不已者以丈有超世之見知僕所以肩鉅承艱之
心者也讀禮有暇試一思之倘再會有緣尚當刮日
相待

答河道吳自湖

惟公遵養林泉望懸朝野僕所欲推轂者屢矣咸爲
忌者所阻今乃得遂初心然猶恨其不早也淮楊之
民歲苦昏墊朝廷未嘗一日忘顧莫有任其事者
茲讀大疏明白洞徹底績可期夫治水之道未有不
先下流者年來但講治水不求治海雖費何益但海
口之淤當必有因似宜視水必趨之路決其淤䟽其
窒雖棄地勿惜碍衆勿顧庶幾有成也設官及留餉
諸事一一如教屬所司覆允惟公堅定而審圖之

答兩廣凌洋山計剿羅盤寇

羅盤淥水之事石汀公在任不能處乃諉難於後人

誠爲不恕然此地不沾王化數十百年義所當討在公誠不容使之跳梁於卧榻之前也但須審圖而後動動而必勝勝而無損乃爲萬全不然又不如姑置之之爲便也

答河漕王敬所

人有自邊來者言公按行部中簡靜清肅邊人咸不知有命使之至詩不云乎蕭蕭馬鳴悠悠旆旌之子于征有聞無聲公之謂矣慰仰慰仰淮揚水患之旨盖欲激發吳公使之殫力以從事也 朝廷方有事東方而江淮之人咸謂僕止以運道爲急將視河

引文
卷二
八
害而不救故以此默解之自公振新漕政萬艘飛渡
京庾充盈卓哉偉績孰得而掩之豈以此一事未了
爲恨哉且不必出於已公所未就而吳公成之則亦
公之功也已辱教似未達僕所以作勵時賢共熙帝
載之意故畧述其槩以復惟公裁亮焉

答兩廣督撫計劃海賊

往者潮州主撫賊之議閩人深有憾於金大叅科中
遂加抨劾僕竊以廣中之處不爲失策乃告銓部本
兵言金君必不可動動則後來任事者皆恫疑首鼠
而不敢爲矣然林鳳之見創於呂宋實閩人之謀彼

以大兵逐此敗殘餘黨欲盡殲之海中以爲功而廣
中乃一舉而收之其致憾固宜今惟行廣人之策收
閩人之功則處置適宜彼此俱得矣銓部本兵以僕
之言爲然遂用此意題覆今讀大疏詳觀前後事理
果如僕言其中措置皆極允當蓋昔年撫賊率要求
善地安插蜂屯蟻聚列兵自衛在我常有肘腋之虞
在賊常懷反側之意養癰待決誠非計也今則隨地
分北解甲賣刀因其求生之誠解此三面之網將使
賊黨聞之孰不懷我好音變其佚志故廣中之策是
也然觀金君所與閩人往來文移頗覺動氣楚固失

之而齊亦未可爲得此氣質之小疵也卽欲取此新
績復其舊官但閩中勘功疏尚未至若先處之重激
閩人之忿故行並勘幸促勘者速報庶便處分也羅
旁事宜審定而後動期於萬全乃可貴屬司道有司
賢否訪據的實者幸另開手書密示

與雲南巡撫王凝菴

高金宸先已題奉 欽依准襲矣外嘉靖間曾聞雲
南有積貯銀百萬兩 世宗欲取用而方礪菴執言
該省常有出兵事宜以待用不知此項銀何年存剩
今尚有不卽查覈見示餘不悉

答應天巡撫論大政大典

辱別楮所云一一領悉安慶軍餉及三府糧疏俱下
部覆允馮蹇二君屬部優處政府人人言惡吳中士
夫賴糧之說似別有所指不爲丈也異時每聞存翁
言其鄉人最無天理及近時前後官於此土者每呼
爲鬼國云他日天下有事必此中倡之蓋謂朝廷
之政令不能行於此地而人情狡詐能忍人之所不
能忍爲人之所不敢爲故也此等言語豈亦丈告之
政府耶願秉道自信毋惑流言以終令聞丈向移駐
句容議者咸以爲多事近更喜其安靜蓋用度節則

里甲無徵索之擾趨謁省則驛遞無供億之繁故上下自相安耳喜甚今驛遞一事在東南不知何如畿輔諸郡十減六七行旅初覺不便近來亦頗相安若小民歡呼歌誦則不啻管絃之沸溢矣且此項錢糧貯積甚多將來裕國足民更不外索卽此一事餘可類推以今全盛之天下爲國者肯一留意於此時時修明祖宗法度精覈吏治能否由此富國富民興禮義明教化和撫四夷以建萬世太平之業誠反乎耳大抵僕今所爲暫時雖若不便於流俗而他日去位之後必有思我者蓋僕之愚無有一毫爲已之

心故耳 祖墳事嘉靖間王戶侍亦曾疏請後竟以
無據報罷竊思此事在 聖祖時已屬茫昧夫以
聖祖之永孝豈遽忘其先世殆必有不得於心者耳
今去二百餘年復何所憑而修復之且此事不在疑
似之間如以爲真則非有司少牢之禮所能享之又
豈可以社屬待之如其非真則此纍纍荒塚祀之何
爲僕嘗以我 聖祖之不冒世族不深求先世窈冥
之跡不諱言身世艱窘之狀皆神智達觀度越前代
帝王遠甚今日之事似只傳疑可也鄙見如此惟高
明裁之

答河道吳自湖

混江龍之制昔曾聞之近以河政廢弛人不知用耳
頃屬所司題覆通行河道衙門一體製造

答楚撫陳文峯

辱示公安諸邑連歲昏墊生理蕭疎昨蒙加意賑恤
頓回春意今民力雖困猶賴父母孔邇橫恩溢澤亦
不過徼於臺下也郡侯才守俱優向以初任銳於有
爲頗失上官之意今則久而愈孚令聞休洽昨已特
懇之向院諒在彀中矣荊州二衛班軍分番往戍誠
於守禦有裨已下部覆允矣昨曾確菴來言公舊僚

意頗相左大非所望或意見不同耳願公且恢渙之

答王敬所

辱示邊務諸款皆切中機宜事竣亦不妨條議上聞也又承別諭云云謹逐條手復納還記室不另具復以示不敢泄此後有要務請手翰密示口授非宜

答河道潘印川

惟公雅望宏猷久切傾嚮昔者河上之事鄙心獨知其枉每與太宰公評騭海內佚遺之賢未嘗不以公爲舉首也時屬休明之會正宜亟時建立用展素蓄乃猶盤桓引却殊乖所望大䟽已下銓部議覆雅志

引九岳文集 卷二十八
恐不得遂幸遘發征麾以慰輿望厚儀槩不敢當謹
以璧諸使者

答操江王少方

江洋獲盜事關王印自合上聞鄙意以爲盜贓已獲
可從寬處不意主上覽疏中縛王刼印語赫然震
怒面諭重處區區從容解譬下部議覆上意以
部覆撫按罰治爲輕區區又委曲議擬乃得薄譴盖
主上恒以冲年惡人之欺已故以失事爲可追而以
隱慝爲深罪也人旋草草附復其詳容另悉

答河道吳公桂芳

淮楊之民方苦昏墊披髮纓冠而救之猶恐不及豈能豫憂運道之難處耶今且拯此一方之民從容講求平江遺蹟爲國家經久之圖今內外儲積幸已漸裕法紀漸張根本漸固此等事他日自有賢者任之公毋慮也

答總憲吳公

盜劫官銀於會城之外本非細故但人贓已獲大半公亦叅論無隱自當請旨從寬然諸未獲者猶宜速爲詰捕盜者必獲獲而必誅則人自不敢爲矣

答廉憲胡公邦奇

辱別教云云深荷至愛前王操江亦曾以尊意告僕而僕不以爲慮蓋僕素以至誠待人絕不虞人之傷已至於近日之事則反噬出於門牆怨敵發於知厚又適出常理之外無所容於防也古云寧人負我無我負人况冤親平等悉歸幻妄今轉眄之間已成陳迹矣何足掛之懷抱乎然感念厚意中心藏之

答操江王少方

四月二十六日五月二日二書先後俱至一一心會不能悉答滁州鎮江二事部覆悉如疏議近來江防外雖鋪設觀內却空踈無實此言切中時弊蓋不

江防爲爾然昨江西浙江二事 明旨森然此後卽
欲推諉粉飾恐亦難矣安慶軍餉部議執前已覆定
不肯再更然陳君之意爲長也陳君昨考察疏亦佳
區區素知君後當優處聞有馬驚頃想全愈曾司馬
近亦小恙已痊小魯乃翁訃音至矣兄兒頃歸一役
一馬 皆自行顧倩併未敢令有司知之

答巡撫鄭範溪

辱示虜情具得其真今計惟當急圖自治以觀其釁
耳張憲副之被論人皆以爲枉當時言者殆有所承
望彼時公似不宜與之會同蓋是非之在人心自有

張大岳文集 卷二十八
不容枉者豈可徇人以爲毀譽哉頃科中復有言者
要當請 聖斷行之

答應天按院舒念庭

辱示內廖守備事已卽達之於內言公治其違法之
人乃所以相成而非所以相病也其意良解然以僕
虛心論之此輩在今日比之先年已爲斂戢苟不至
於太甚似宜放寬一着以養其爲善之意可也惟高
明裁之

答薊遼總督方金湖

辱教領悉近來東虜垂涎於貢市之利陰與青酋交

通携市於宣府而明擾遼左以求爲市故宣府之馬
歲增而遼左之患日甚職此故也遼人素稱忠義可
用然近亦罷散非用薊人助之不能支也顧薊鎮隔
閔三衛出塞不便又迫近陵京防禦爲急必斥堠嚴
明偵探的實知賊嚮往乃可出他道用奇以制之耳
此意前已屢語薊人尚未得策承教當再申儆之聞
那吉給台吉俱親至邊此來想彼亦有意宜厚遇之
俺酋老矣黃酋窮蹙無賴虜中之勢在此兩人須常
與之氣脉相通乃可大約虜情只要渙之無令得合
而已

答鄭範溪

張少叅之事言者明係承望搜求公爲之昭雪乃是
非之公在人心不容泯者奈銓部固執前說又追論
其平生此其意不可知矣僕欲請 旨駁議又思於
該部禮面大有所損不得已弔勉從之然僕心知張
君之枉今雖暫屈後猶可伸也公前雖與按院會論
而其語亦自不同今奉 旨再勘豈得不據實具奏
但求是非之不在何嫌前後之異詞哉今 朝廷之
上功罪賞罰如鑑之虛如衡之平公但自信此心秉
公直紛紛之言不足爲意况 朝廷又自有公論

哉

答遼東巡按沈鶴石

辱示領悉順義所求督府已傳鄙意止之矣虜情不
常宜隨機應之要當待以至誠要以盟約則貢市必
可久而不變安邊制禦之策無踰於此書生不達時
務難與言也外貴院帶管學校近給有新勅宜令人
領去以便行事

答薊遼總督楊晴川

庸將輕率寡謀損威辱國歟不足惜但古北口要
地素稱險峻乃賊至數十人踰垣而入肆其侵掠而

守者不知則置兵設險俱屬無用矣且賊初意止於
侵盜原非設伏誘我者宗儒之出從者百餘人使人
人致歿未必便爾覆敗乃從者見賊先奔遂致主帥
陷沒觀此舉措將來之事深屬可憂轉盼秋防僕寢
不安席矣今且先絕賊酋撫賞諭令縛獻首惡如處
王果事從容相機而行急則恐生他患其守臺守口
及棄將先奔軍人宜以軍法重治察其尤重者戮數
人以申軍令薊門數年安靜人心已懈天其或者借
此以示儆乎若諸公當事者紐於治安不加戒備則
其患有不可勝言者矣且南兵素稱敢戰今未効一

矢之力見賊先奔何以解於紛紛之議惟公熟計之

答南總憲吳堯山言法律章奏

南臺試職奉教卽屬銓部覆允但御史以原官試職理刑蓋使之習於事以待用也近來居是官者不知本職所在舍其當務而漫求他事以塞責居數月而考選實授祇具文耳一旦奉使觀風乃不知法律爲何物而反以吏爲師祖宗命官責任之意幾於淪失矣近奉明旨修復故事而御史大夫陳公卽以實舉行甚稱上旨試之日坐於堂上面加校閱舊日易卷代書之弊悉行釐革僕取其試卷觀之一一

列女傳卷二
親批其所殿最咸以招擬爲準不論章奏之通否蓋
章奏議論人人能之若招擬刑名則非素究心於此
者不可以虛言飾也賢哉大夫可謂霜空之矯翰矣
南北臺諫原無輕重今旣新奉明例似宜一體舉
行且以公之高明峻整視陳大夫又奚讓焉

答閔邊郃文川言戰守功閔

承別楮所評騭一一精當比者古北口之事特欲借
此以儆惕人心其實薊鎮屬夷促人要賞乘間爲盜
自昔已然昨日豎子若不輕身出塞浪追則亦無此
喪敗矣今四方所報殺官劫庫之事無歲無之中土

且然况邊境乎薊帥昨蒙嚴旨切責足以示懲若舉
全鎮防守之功委無所損數年以來一矢不驚內外
安堵此其功寧可誣乎猫以辟鼠爲上品山有虎豹
藜藿不採又不以搏噬爲能也似當以公初擬爲當
若欲爲之委曲除豁則可云據近日鴉鵲屬夷之事
雖若防禦少疎然舉一鎮修守却虜之勞實於功名
未損以此意措詞不知可否惟高明裁之大抵薊鎮
之勢與他鎮不同其論功伐亦當有異盖此地原非
邊鎮切近 陵寢故在他鎮以戰爲守此地以守爲
守在他鎮以能殺賊爲功而此地以賊不入爲功其

勢居然也至於調用南兵一節實出於萬不得已蓋因往時議者咸極言延寧邊兵入衛之苦爲之罷減四枝薊鎮分區而守罷一枝則一區失守又不可棄地與賊於是譚總督戚總兵乃建言昔在浙中部曲尚多素所練習者可頂所罷之數因以教練火器整理車營故不得已而用之今若以爲虛費而無用卽當罷之則宜思戍守不可缺人或仍復入衛邊兵或於本鎮地方抽採不然陵京重地寧敢忽視之乎此中事體其說甚長統俟面悉

答總督楊晴川計處屬夷

辱示失守諸官軍俱法當其罪從此人心庶其有儆
乎屬夷原謀止欲爲盜庸將喪敗實其自取今彼旣
有畏誅之意宜自從容處之但嬖只之說未可盡信
乃自解之詞耳今仍宜厚結嬖只以絕其援盡革諸
夷之賞以孤其黨虜貪而無親他日必自相夷滅炒
蠻亦可縛而致也若歸罪嬖只是使之合其黨以抗
我且啓西虜之釁矣

答總督張心齋計戰守邊將

辱示虜情俱悉公所以應之者誠爲得策矣今全虜
之禍咸中於遼連歲彼雖被創我之士馬物故亦不

少矣彼旣憤耻必欲一逞今秋之事殊爲可虞昨已屬意本兵於貴鎮兵食比他鎮尤當加意臨期若的知虜賊所嚮當令薊人助守寧前使公等得專備東方如犯寧前則東西夾擊再一剗之則彼破膽而不敢東窺矣公幸時時諭意李帥大將貴能勇能怯見可知難乃可以建大功勉之慎之爲國任事之臣僕視之如子弟旣獎率之又寶愛之惟恐傷也惟公垂亮焉

答山西崔巡撫計納叛招降之策

叛人背華向夷法當顯戮以絕禍本但所示二策似

俱未善蓋今之虜情與昔不同昔未臣服故可用計
處今既爲一家凡事又當待之以信諭之以理向者
款貢曾與之約云除板升徒衆既多在虜已久許令
照舊耕牧外自納貢以後我不受彼之降虜彼勿納
我之叛人今彼納叛非約也宜令曉事通後明言索
取之云往年所與王約誓者云何今聞有某人在彼
其言云云凡此等人皆吾中國犯罪當歿及貧困不
能自活者乃逃往彼中以脫罪乞生耳其云云者皆
妖言不足聽也往嘉靖年間有蕭芹者叛入虜中自
言有神術咒人人輒歿喝城城卽崩俺答信之令人

押之於邊城試令喝之而其術無驗當是時俺答方就大同乞貢中朝業已許之會邊臣以此事聞

世廟惡之遂不許貢後蕭芹竟爲邏者所得梟首邊關此往事可鑒者也今彼旣與我一家好惡同之我之叛人亦彼所惡萬一此事聞之朝廷必以彼王爲背盟約納叛人王雖欲輸誠款朝廷亦將不信則兩家大事從此壞矣王如曉事宜將此人及其黨與執送軍門朝廷必鑒王之誠款和好益堅賜賚愈厚何爲納此無用之人聽其妖妄之說而壞已成之功失永久之利哉彼聞此言勢必聽從卽彼不從

我常持此以責讓之使曲在彼則我之威信亦無所
失量此么麼幹得甚事今板升之人如此輩者何啻
千萬卽索之而不得亦惡足爲輕重乎彼雖犬羊亦
不可欺用術以求之或未必得而彼反持此以誑我
矣惟高明裁之大抵虜情不能保其無變今中國之
人親父子兄弟相約也猶不能保其不負況夷狄乎
在我兢兢自治常若待敵小小變動勿遂驚惶勞攘
但當耐煩處之隨幾應之期令無大失而已若欲事
事完全人人守法則是以中國之所不能者而責之
夷狄也有是理哉此事似宜與軍門熟計而行萬惟

留意

與總督方金湖以奕論處置邊事

近見山西巡按疏中言邊人叛入虜中者甚衆宜大
巡按有書言擺腰入市時伏甲於邊外及黃酋遲延
不肯就市其意蓋調虜情有變也不知其中情狀何
如其云云者皆實否幸惟明示又得崔巡撫書云索
叛事似爲未善僕已復書令其改圖不知可否亦曾
聞此事否今錄回書併崔原書奉覽以便從事然會
崔母言得見其全况經一番變動得一番處置而其
事愈固往時廟堂無定見一聞浪語卽爲動搖譬之

低基隨敵嚮往應手卽下今則不然吾審勢已定窺敵觀變或無事而自補或棄子以求先此今日之局面也諸公當事者宜審計焉

答雲南撫院王毅菴

辱華翰領悉前奉詢滇中積貯以魯聞之礪菴云云將謂彼中尚有此數不意年來遂以解進今所餘但令所司謹守之以備緩急一二年間調停酌量內帑漸充加以北虜納款邊費少省僕朝夕所告於上者諄諄惟以節用愛民爲急此後撙括之令或可免下所以瑣瑣奉問者惟欲知郡國財賦虛實之數耳

引九岳文集 卷二十八
礦金之害往大理李中溪先生亦曾言之第以此項
專供 御用宮中視爲額辦未敢輕議停寢稍俟機
會當有處也續刻小疏一通奉覽

答南臺諫

承諭欲以拙稿付梓昨已致書王少方力止之蓋此
帙雖無造膝密勿之語而其中亦多未發科抄布者
若梓傳四方未免掩 主德而炫已長非入告出順
之義也至於求存翁序首云云猶不敢當存翁吾師
也翁昔以家 國見托今思昔所許者尚未能力踐
其一二何敢以案牘糟粕之詞致辱名筆哉惟丈俯

鑒愚悃早爲停寢僕此意發自丹懷絕無矯僞若舍
曰欲之而爲之詞則穿窬之行丈諒僕必不爲也

答南列卿張峒峽

惟公雅望厚蓄昔被浮誣今始昭雪故暫借南寺以
迴翔遵養焉辱華翰遣謝深以爲媿前賤日蒙惠槩
未敢領仍宜查之主藏者

答督府吳環洲

辱翰教領悉炒蠻者與西虜嬖只爲婚昨遂嫁言爲
盜者嬖只也此薊人欲爲解罪之言昨已責之彼中
當事者言初報爲盜者屬夷也與西虜無與朝廷

所欲誅者炒蠻耳此後勿得嫁禍於隣然僕料此事必借公力而後能之公幸使人密說青黃諸酋勿與惡人爲黨啗之以厚利偵知炒酋所在或誘之使復歸舊巢則罪人或得也已令薊人緩圖公幸留意虞

答山西崔巡撫

水泉之市不知在何時聞宣大互市兩撫院皆親臨彈壓故得無譁水泉市日亦欲煩公一臨庶無他又京師近緝獲一虜人初稱黃台吉部下所使爲細者後審是公昔年所遣爲廖舉人僕者呼廖舉人面認之良是但不知公昔年何自得之也武員道其

實以便處分當解送臺下隨宜安插若以爲奸細恐因此遂生釁端也

合楚按院向明臺

頃以二三大事借留數月故未題代差期當在初冬矣辱示江陵尹朱正色均差之議其中綜理精當詳密此君初任人皆以爲刻核僕獨愛其明作今觀其所建立必爲良吏無疑矣慰甚慰甚一條編之法近亦有稱其不便者然僕以爲行法在人又貴因地此法在南方頗便旣與民宜因之可也但須得良有司行之耳向所言棍徒艾姓者後竟不知何以處之實

慶生員歐歿取官事似宜正法以警刁頑

答南臺長陳萊峯

海洋失事非公言 朝廷豈得聞之人臣之義以不
欺爲本事有失誤當具實以聞至於恩威輕重則
主上明聖自有裁處必不有乖於情法之中也

答總督方金湖

貢市三年論叙與昨閱視舉劾並於一時雖若有防
然閱視以八事爲殿最貢市以款虜爲勤勞閱視優
於要職貢市逮於卑官固自並行而不悖本兵前已
定自宜循例舉行但已加恩者或不能過優耳白

帥賄李之說前敬所已曾告之於僕但追思當劉國
被劾時僕卽面問本兵譚公此人若動孰可以代之
譚卽應曰白可又云若論才力則麻錦爲宜獨恨其
多方營求爲可惡耳渠倉卒之間卽以名應似非有
夙諾者况旣惡麻之營求又豈肯曲詢於白乎云云
之議未必非劉麻搆之近來將官彼此相傾甚於文
戰此中隱情亦宜徐察之也奸細之事誠如尊教近
所獲者皆未必真已隨宜處之矣

答潘巡撫

寧州之賊從來已久事關兩省宜約會夾剿之庶可

收功固難以旦夕定也新除兵憲恐不足以辦此銓部謾爾陞授僕知而使改之則無及矣公試觀之若果不相應當速奏調改又公退居旣久近來政令或未盡知宜查近年 旨意并題准事例有與撫按相關者籍記而時閱之則自無廢格錯謬之虞矣

答河道吳自湖言蠲積逋疏海口

頃蠲豁舊逋乃發自 聖心僕不過仰承之耳然須得良有司悉心綜理庶幾 主澤得以下究惟公留神海口疏通淮揚之間歡聲雷動從此人得平土而居繫誰之力與以此知天下無不可爲之事人存政

舉非虛語也。比者暫行薄賚，俟玄圭旣告之日，仍當有殊錫焉。派磚事江南撫按諸公，咸以爲難措而司空又以近日工作浩繁，不肯爲之一處，惟公裁之。

答應天巡撫宋陽山

鹽徒執捕，海風覆舟，在往時誠爲常事。若一一責之該道將領人，將何所措其手足？宜吏有不平之鳴也。但按操使者見近日屢有嚴旨惡人欺隱，故一有所聞卽倉皇奏報，以爲他日脫罪之地。頃王少方有書來，亦言屢勸止之不從，蓋自爲之心重，故不暇爲人謀耳。要之主上睿明揆度事理，衡鑒明允，其輕

重予奪必不有乖於情法之中王太叅僕欲大用之
何乃以小忿決不就幸諭安之

答總督楊晴川

賊夷犯順仗義執言以討之馘其渠魁赦其脅從理
之正也但賊既畏威遠遁獸駭鳥舉難躡其踪而揚
兵出塞之舉竊恐薊人亦未能辦也若賊酋果真心
悔罪執送爲逆頭目一二人散夷數十人歸其所掠
則姑宜宥之徐爲後圖吳環洲示強示弱之言是也
辱問草草

答方金湖

六貢告成邊圉寧謐雖朝廷有道守在四夷而公經綸之略安攘之勲庸可掩乎敬仰近聞虜酋與察罕構隙日深此正吾用奇之日使之禍結而不可解則薊遼之間可以安枕而西鎮之貢市愈堅矣宜多方以間之他日奇功偉績必爲公所收矣

答閩撫劉凝齋

鳳賊之敗潰本之皆公謀也頃部議但據報功之有迹者覆請行賞實未足以酬其什一也然人臣事君寧使功浮於食况主上聖明有功者雖微必錄雖久不忘尚當有大畀焉

答遼東巡撫張心齋

連日不聞虜報彼旣得利於海西必且歸其所掠未能復逞但遼左之事多在深冬宜加意防之虜性惟論強弱讐隙一搆報復不已王台旣被襲虜讐恨必深彼素效順中國父子俱蒙恩賚其德我也亦厚宜急以計結之俾爲外援則北虜之真情可得而我之藩籬益固矣惟公熟計而審圖焉

答吳環洲

前辱示邊事公高見遠識甚合鄙意膳房堡事僕正恐觀風者輒行奏論致駭聽聞擬作書止之不意大

疏隨至而沈君亦遂匆匆叅劾將官蓋渠惟懼以隱
匿獲罪勢難中止又連及別事則過矣夫疆場之間
小小破綻未能全無要之於大計未損若遇有事卽
行處置一番於大計反爲有益顧君不察耳今都邑
之間猶有白晝剽竊劫庫殺官者况夷狄乎薊門三
衛服屬二百餘年矣捉人挾賞猶不能一一盡詰乃
可責之驕悍新附之虜乎要在當事者隨宜處置譬
之於犬搖尾則投之骨狂吠則擊之以箠旣箠而復
服則復投之投而復吠則復擊之而可與之較曲直
論法守手前有書與方公方答書云耐煩二字邊臣

引大岳文集卷二十一
宜書諸紳誠然昨部覆已明只如公前議行之然僕料虜已中餌決不舍貢市之利以理責問必無不從者

答雲南巡撫何萊山論夷情

道從已抵貴竹慰甚所示安酋事具見高識遠猷

朝廷可逭南顧之憂矣追念安酋庚午之事本守臣處置失宜所致及釁端已構遂欲調三省之兵捐數十萬之費以剿之僕竊以爲非計乃選用阮沙城巡撫授以五章之約阮公幸用吾策不用一卒不費斗糧而黠酋稽顙繫組納質請罪此已事之明効也夫

土夷雜種譬之狐鼠鼪鼯據險爲固得其地不可耕
也得其人不可使也以國初兵力之強高皇帝
之威豈不能畫野而郡縣之勢不可也其種類忿爭
相殺固其性然又非可盡以漢法繩也究觀近年之
事皆起於不才武職貪黷有司及四方無籍奸徒竄
入其中者激而構煽之星星之火遂成燎原守土者
又不深爲地方長久之計輕信偏辭遽爲騰奏小則
構訟大則用兵驅無辜之民置之鋒鏑以爲夷狄報
仇幸而勝兵罷財費將吏冒賞於國家無秋毫之
益不幸而敗三軍暴骨損威傷重其禍又有不可勝

言者此已事可鑒也故僕以爲制禦土夷之道惟在
謹修內治廉察邊吏毋令貪吏需索結怨起釁禁戢
四方奸徒毋令教唆播弄致生嫌隙鎮之以威示之
以信毋以小術欺誘之但令遵奉約束不廢貢職而
已此外不必過求其中或有爭忿相訟者兩是而俱
存之槩行會堪亦毋輕爲奏請待其彼此相戕勝負
已決吾視其理直而爲衆所服者因而撫之理曲而
爲衆所不悅者因而除之卽疆場定矣何致紛紛勞
民動衆敕內以事外乎南北夷虜之勢不同其處之
之道亦異管見如此惟高明擇之

答陝西學道李翼軒

近見閤中錄文甚佳多超曠之見知必出於執事之手爲之擊節者久之所示西略一一領悉春首之事已成夢幻不足復論不穀於執事相與深淺執事心知之

答吳道南

承示辯揭殊足發笑是非混淆一至於此南疏必有嗾之言者不察耳先是部院訪單其說尤多大抵皆忌者之言故銓部議欲從重僕再三爲理乃得量移然被誣已厚矣世味人情不過如此區區昔與執事

有世緣出世緣今天下幸而無事區區且欲解簪褓
從赤松子遊矣覺與執事世緣已盡再結出世緣耳
執事肯從我乎

年齒之

張氏閣中雜文甚多卦多跌鯽之見味必出於持事之

答刺西學館李翼揮



